

四庫全書薈要·乾隆御覽本

集部

御定歷代賦彙卷十七

地理

感山賦

有序

宋 崔伯易

客有為余言太行之富其山一名皇母一名女媧或云
於此煉石補天今其上有女媧祠因感其說為之賦其
辭曰

曲轅先生從先大夫之南征省黑許於紫霄訪武王於

朱陵授羅浮之隱書擷三茅之神英息肩淮泗之濱閉
關弦歌與世無營一日梁園公子銅鞮處士闖然踵門
悅然相親曰先生倦遊者矣祈有異聞先生不對賓請
愈勤於是為論山中之物山中之民叙山中之遺歡詠
山中之淳文二客相視而笑曰先生唐相之家族蕃西
京京於吾鄉駕財累程連聯高山見於羣經茲其不言
疑未之行試為先生陳之何如公子贊之處士曰夫坤
厚之勢猶一人之體崑崙為之首自首而下峽崕屹嶠

無復平地陵轍百國有陰山焉橫二千餘里北為戎狄
南為古聖之所治測中言之殆吾國之乾位昕天銅渾
周鞞保章參地之形茲為最詳上正樞星下開冀方逢
胃而畢自柳以張亂則冀安弱則冀彊起為名丘妥為
平岡歸乎甚尊其名太行挾大河於楚東瞰北嶽其在
旁其高也邈迤而上始莫知其高也登躡千里昂目而
前望駭竇與夫天當其深也繚繞盤辟始莫知其深也
馳朔東而左轉垂三月而見脊盛連延乎碣石傳曰東

海之水不盡而此山也吾莫知其所極此其知言哉如
彼大邦圻鉤壤連如彼大川洲維浦聯殊鄉異觀習乎
所傳坳然若鞏者曰鞏山突然若竈者曰竈山色黑者
黑山形方者方山如此之類名何足殫墨翟察而知驥
之貴尸俊過而辨牛之難穆王升由雀道而出世宗行
自大河而還孝明嘗登幸上黨郡章帝以游至天井關
孟德北上紀摧輪之恐謝公西顧引憂生之端阮籍失
路而詠懷劉峻懷交而發歎歸晉陽子惠之便道對二

坂祖濟之祥觀開元錫問於逢車武德置縣而當煩霍
褰吾襟共附吾肘纏午壁之勢探長城之口天門揭其
部分烏嶺支其躡蹂姑射王屋隆慮雷首靡迤嶽岑參
錯飭餽或拱其左或捧其右或導其前或贊其後讓以
竒獻貢以重岫曾夸娥之輸力擁大帝之寶授上晷燿
兮鵬擊下砰磕兮鯨鬪又若王畿之外五等諸侯奉命
守土率屬千萬悉面內而騰輳此山之形也汾潞丹洹
滹沱澗易涑沁淇潼青源濟湜奄响將迎縱橫激激安

陽巨馬出其胯白絮北涿度其腋觸遙阜以孤引激榮
光而歷冪凝染漸漬裒青貯碧此山之容也奠荒有神
開社有伯以風主威以雲主澤翻手燠陽覆手霹靂近
靡百城遠霈萬域暴暑亟寒暗天一白煙不得為瘴氣
不得為疫豈其幽深也深其欲而難期其并合也合其
力則無敵此山之氣候也軒后以來至於成王自時建
都遷徙不常遠近表裏其陰其陽春秋之前封國既多
春秋之後惟晉為強大抵以兵為阻以險為防守不敢

弛戰不敢忘越至卑耳而齊相以霸一入孟門而平公
幾亡燕趙中山衛韓與魏或主山東或主河內或主山
西或主河外或城其隈或據其會或保作咽喉或恃為
腹心屯留有常阻山陽有常界跬步之側萬人死之復
驅萬人而地不少退如羸斯林如蚪斯壑左顧右睨爪
牙鋒鏑乘間薄人肝腦塗地以寡旗虜將而為樂不然
假息竊視扞以城郭從姬歌兒名珮重璞不敢不獻雖
欲藏之亦終歸乎攬搏駭乎哉固嘗一朝之中一舍之

間烹四十餘萬之衆築頭顱之山舉長平為鼎鑊舊壁
荒城豆分暴錯今千餘年幽陰寂寞此山之勢勝也當
時雄豪迭指交質行野者非樂其野逐獸者非即其獸
徘徊陵陸踰跣陂阜裁約六國睥睨九道孰為龍首孰
為天竈向背孰從草木孰遘器械孰便憑倚孰厚東西
孰廣南北孰衰為蛇孰尾為鶴孰喙孰方孰圓孰牝孰
牡衝輪孰敏沮雁孰懋孰利襲掩孰利藏覆孰此出擊
孰此入寇孰可徒搏孰可騎驟孰可啗誘孰可斥候孰

可接戰孰可挑鬪孰最恐夜孰不欲晝勝此孰逐敗此孰救佯道孰止乘亂孰走孰要於邇孰閉其後記省在目陳說在口憑軾結鞞忿豢去就所過之邑鸛視狼吼詰無不講嚮無不偶入軍則建旗鼓入朝則佩印綬以國試膽以民試手為縱橫家隨以此售關警遲速稱畫貧富矯尾厲角恐愒翻構鬼神不能窺其密賢俊不能糾其繆中人主之利欲移將相之恩舊其後或主或臣建功立業尤顯聞於後世則有決羊腸之險塹此山之

道攻滎陽伐韓以威天下應侯為秦昭王之謀也據敖倉之粟杜此山之險距飛狐之口守白馬之津使天下知所歸者酈食其為漢高祖之謀也踰此山入射犬破青犢之衆殺謝躬於鄴以收復天下為心者漢光武之謀也濟河降射犬之衆還軍敖倉屬魏种以河北事然後西向以爭天下者魏武帝之謀也進據武牢扼其襟要俾竇建德不能踰山入上黨收河東之地而卒以并天下者唐太宗之謀也徐思以觀亦吾之近藩北壓燕

薊西臨順檀籠裏控外聯區接寰州開其隅邑疏其間
衡而為壘缺而為關有朝歌內黃黎陽之支離有五原
高平廣民之依攀前規成皋逆嬰邯鄲收褰帷趣駕之
威宰簪笏假轡之官大城望之如雲小城夾而金安各
負城勢能驤虺蟠宿貔貅之徜徉峙芻粟之巔岿此又
其山古今因人以明效者也偏隅之稔蒸鬱成象或為
樓闕或類亭障下利懇闕其土白壤穀備五種穎粟豐
穰以陶則不窳以牧則易長駢馮駘駟驪馭繁鬣

赤喙黃脊白頰竒毛異骨駟駝駛驚或出凹揜或會廣
敞或隨齧而乍散或就飲以羣往秦青覩之而目眩造
父逢之而伎癢若乃邊風夜號寒氣朝蕩木葉晝脫川
原蕭爽挺逸彩之疎瞬厲雄心之倜儻分騰而郊野暗
聚鳴而阡谷響最下者羸糧載士日中而馳百里鳳臆
蘭筋探前挾後何止乎蹄間三丈馬之所施險之所依
有德者然後能之其或守之不以道用之失其宜則是
二者在所為盜賊之資司馬侯告晉侯以先王之不務

者非棄之也而吳起言商紂之國志有激於當時何則
宣帝處先零金城而終貽漢患武帝倚元海并州而俄
傾晉基自後聰曜石勒姚萇季龍元魏高齊諸符慕容
呼侶嘯類提羌占戎或屯於定襄或保於居庸或建都
鄴下或渡軍河中或改元離石之北或僭號沙河之東
胡塵一踰三關遂空長安之城洛陽之宮搖轡長驅傳
國都而扼蹤暴衣冠於塗炭客宗廟於妖兇更帝迭王
抑為盛衰其四方簡冊不可得而書者凡幾戰而幾攻

由是觀之為彼君者始之失於一朝遂使天下之人親
戚離散一百二十六載挂性命於兵鋒此又當世賢人
君子登高慮遠所宜追述為萬世深誠者也當彼之時
國中窄而山中寬天下危而山中安外儉人苟容以盜
官兮內浩歌乎考槃外吁嗟愁涕之辛酸兮內遊鹿豕
其方歡外窮奢極侈以相殘兮內交讓乎瓢簞外伏楛
縮劍以銜冤兮內樂天其盤桓仁智所依仙聖其迹其
動如龍非迅雷烈風不起其出如鳳非醴泉甘露不食

服皇媧之妙道藏補天之神石或餌朮而採芝或吞陽
而嗽液或自耦於樵釣或偶懷於老易引公和之餘韻
振文舉之歸策壅王二老猶自輕之士壺關令狐殆多
言之客至精元以友造化緒餘尚足以治萬國此其山
之隱逸也即以仰之首名歸山岑營紆餘巉巖屏顏曳
泉紳之飄颻束雲水之迴還積衆精於寶姥糝靈氣於
天丹轟霞霞之朝覆豁光怪之宵環其金則鈇鑿鏐銑
鐐鏦鏑鏞其玉則瓊玖瑋瑁瑤琦璵璠石黃綠而青碧

珠玫瑰而木難餘糧石脂之磽确赭堊理長之爛褊陰
映宛倚穹注蟠聯絲締纒縷鉛鹽銅礬備先賦之不名
距三方而祖繁復有紫沙黃霧神銅是取逗落液於庫
澗萃堅英於弱土播蚩尤之遺勇回歐冶之靈顧下分
擅乎百源上夾輸於六務此其山之琛賂也其鳥五色
豪鷹窟生峻嶒貌如愁胡皎月明星响撥利戟足卷枯
荆鷗趨鶚隨往還青冥木棲則鶴鷗鸞鶴水止則鵝翠
鳧鵲殊種詭類莫可殫名其狀如麋有距四角馬尾聲

若鐘磬以出為瑞赤虎文豹黃熊封豕麇鹿獬豸行搏
坐噬草則紫團之葎勤母漏盧麋銜牡蒙從容首烏牛
膝豹足龍沙虎鬚赤節紫蒨如雷芘胡雲英玉支解蠶
菴蘭鹿腸鶴蟲彭根屈据澤態天糝芳臭粉敷或同葩
異實或冬榮暑枯或珍傳太一或用講史區木則有榛
有栗其桐其椅篁篠懷風桃李成蹊榭枏楓檜思仲蕪
萸梓漆樞栲青檀紫葳樅櫨槐棗棠榴檉黎陽櫨檠桑
枌榆椴槻交柢並節韜唐陰隄身緣中材實資療飢松

柏千歲蹇金石姿彌根萬仞之峰落影千丈之溪孤幹
直出百尋而後有枝遠而望焉或如翔鸞或如蟠螭其
大蔽牛其圓中規參差櫛椽下隔百步猶膠夏而相羈
公子矍然曰陸產之盛僕知焉不若是之詳也且聞之
漢甘泉肇於武帝唐含元建於高宗或決事於上或受
計其中始用材之有餘終興利於無窮陛下臨御以來
四十餘年未聞圖苑囿之觀土木之工戶牖朱綠之飾
詔五歲而一易服玩帷帳之具雖屢補而尚供四方黎

元自視忸然咸願獻力京師進祺皇躬聽鐘鼓管籥之音瞻車馬羽旄之容儻有司因億兆之心率懷衛磁相澤潞之人披蒼莽伐崆嶲賤新甫之得簡徂徠之封激春淫之悍豪扶丹濟其來東經營庶民作為新宮以壯閭乎中區以周嚴乎九重高闈秘廬侍從兮蜿蟺翠旗黃屋往來其沖融追三雍養老之法申其孝慈復延英訪問之迹考其邪正更取士之弊法著久官之新令明刺舉勸沮之典絕苟簡異同之政廣廡長廊翼其兩旁

左選天下經術辨通之士以為議郎居講朝廷疑難之

義補百司之闕出委觀民決獄之事以信其所詳右選

天下材勇溫恭之人以為衛士居講司馬軍機之要掌

諸門之禁出委偏裨別屯之任以觀其所莅與利如此

顧不為偉歟山日以開貨日以通衆庶習知勿為牢籠

欲發者發欲攻者攻登者捐者剝者斲者烹者掇者繫

者弋者四時憧憧皆民所同庶寶之淪幽萬模之紛紜

雕腹彩製羽毛之羣弓矢鎧楯之材輿馬骨革之倫被

服纖華鼓鑄精珍三十取一歸於縣官寧有聞子富而
父貧興利如此顧不為偉歟公子再言處士再思之曰
公子之惠亦云善矣且民可與樂成不可與慮始况乃
三晉人號沉鷲孕鷄火之流烈感斗極之勁氣瞻顧端
巧手足便利蔑淫蟲狂厲之惑無喘夜鞭痕之累專思
慮而喜任俠貴然諾而多慎伎重淪姦侈之化孤守而
莫變由滲唐虞之澤彌久而未墜平居之際以氣義相
視馳馬射獸以為樂投石拔距以為戲悲歌慷慨以據

其鬱矜誇功名以見其志自古受命之主不先得其土則先得其士不得其地不足以控諸夏不得其兵不足以威萬寓粵天寶失御之後事雖近而不復言而五代不綱之時其迹甚明而可以數朱梁失守則晉人南下而急攻河陽師厚不死則魏博六州據山口之路莊宗之禍由鄴郡而起清泰之敗緣上黨之助蕃戎陷相而石滅鄴兵過河而劉去或羣盜乘隙而並出或前軍自比而先渡河東之舉昧李驥疾度控孟津之策世宗之

征賴車駕倍程有南平之遇可畏也如人懷心腹之疾
難去也如木受根柢之蠹故吾太祖皇帝之興也踐祚
五月親平澤潞念賊夫仲卿之計不西下而直趨懷孟
而我用向拱之言速濟河而擊其未聚離穴成擒吳祚
之前料登無難色李氏之深諭如洪波薄江借海以為
力大霆擊空與電而俱赴交廣閩蜀之區淮海江漢之
墟彊侯暴王襲頓踣躑納土稱臣冠佩鄰聯雖天命之
所在亦主威之使然其勢如此猶藏太原謝將休戎十

有九年太宗之弔伐也指師為林轉糧如川斷石嶺之
應剡隆成之堅躬探甲冑劇鋒易弦晝夜圍督六師爭
先壓之以天下之重然後始能破焉迨我真宗撫養其
人留蹕授關南之師促使益安陽之屯許北虜之通和
敕猛將之疏軍以至陛下仁風德澤扶導長養踰八十
春賦不聞竭其財力未嘗疲其身熹辨者不知約縱連
橫之謀尚勇者不知收城奪邑之勤室家熙熙老於耕
耘如養虎者不與之全物賞先至者不導於一津茲奈

何合之深山觸鷲猛而為勅敵之怒心鐵鑿棘矜若南
國之茶海濱之鹽千百良民化為頑兵或蒙欲而拒捕
或負恃而貪陵始寘罪而羣亡終盛氣而橫行鎮之常
員則威有所不足列之大誅則民轉相震驚陸機謂興
利不足以補害君焉孰懲公子曰不然古初生民禽獸
雜居無機械以薦食無衣裳以被軀累聖哀之修其所
無鑽燧取火鑠金於鑪銳以鋒刃俾持以趨逐其蟲蛇
創其室廬剝木成舟結繩為眾刺木為矢弦木為弧以

飲以食以畋以漁服牛輶馬紡績耰鉏後王因之訖今
以娛安有至治之世導民以利復爭亂之是虞太公封
齊熊繹封楚魚鹽之利山林之阻公一發之民往如鶩
不數十年齊楚以富彼諸侯之國民且守法豈天下之
廣人或敢侮調發存邑里之籍出入視保伍之名倚之
守令之良護以使者之能蓋建隆初興通餽之役奚今
日之政姑息而艱行是有司不復舉因民之利四方無
時有可勞之氓弗卹所治之法何如而已亟此禁山榷

海之圖疑所思之未明處士曰君不聞天子之建宮乎
厭江陵之瑰榦空鄧林之巨樹山鬼見榮而儵爍坤后
斥緼而容與青帝執規白帝司矩攝離朱之魄觀其徽
纒舍倅爾之神明其斤斧裁魯鎮以為址判湘巒以為
礎趨步而龜鳥正叱咤而虹蜺舉星覆重椽雲縮萬堵
塗以齊赭甃以號土華薦金石之美梁修牙角之賦揚
瑤琨與織貝荆砮丹而箇輅蒙羽之織縞澗瀍之泉紆
優尊而百禮六樂華國則東房西序邦賄豐息寧主是

邪公子曰嘻上方東被於琉球西薄乎羊同南暢於訶
陵北憺乎空峒積贄鴻臚填貨大農天人之交何求而
不克徒念覃懷之域三河之衝漘斷乎滄溟背棲乎犬
戎齊楚甌越魯鄭巴邛轅有所不適檝有所不通重兵
之常處列城之所宗將帥之治守詔使之過從壤地所
生衣食所庸不疲其貲即疲其力不出於官則出於農
帑焉而乏府焉而空或驕陽淫雨之災或成發備河之
逢流離其民易資梟雄或陰會於朋仇或椎埋以成風

故先諸權俾怡其衷禹散歷山之金而贖賣子之虐湯
鑄莊山之幣而救無饘之凶非先君不足以悅士非首
衆不足以就功如彼泉源我發其蒙如彼委藏我啓其
封設坐視天財而不知發猶有此民而不以為兵徒示
二虜之涵容處士曰君知其一未覩其二琉璃之河華
林之莊昔居臣民今游犬羊然黠虜奚民視此而莫敢
乘焉吾非有以守之殆由天設於王公帝限乎豺狼若
之何侵而夷之以紓其行餌之可欲以發其狂義未聞

於灌瓜兵或興於爭桑投芻生心文子之至喻牛甘必
關管堅之所量國家近邊雖上腴之地久禁而不耕所
棄甚輕為利甚明發丁以通驛隋政之已失治氣而未
盡魏室之旋傾彼烏足陳於治朝哉山東之兵三十五
將之師君所聞也請置其說公子曰大農之家不患穿
墉而廢困倉善賈之行不念眩篋而捐金珠備得其術
則害何能擾利果大入則小或可踈今防秋之兵不寄
之土豪而歲起屯戍繕治之物不蓄於逐州而授於京

都不募人訪銅而私或自鑄重給民曠土而爭糴於胡
遺計若此庸為利歟由衆人焉南牧之慮將智者分北
伐之塗推石傳土決其成功束馬懸車昨予能事實收
燕樂捐范陽涿郡三道之師直壓懷柔拒虎北石門四
兵之勢引輕軍發羌夏之東穴出奇道斬匈奴之右臂
二客紛辨既久色相不平抗袂俱起質於先生先生羈
然而笑適然而興曰坐吾告汝夫有財而弗取無道者
之言也取而不以先王之制無法者之言也二者吾聖

人之深惡不順乎冬夏不相乎陰陽禽獸之殄暴貨幣
之誅戕不時而源枯不禁而山傷逆於天元降為災祥
則雖傳道之人豈容無責哉古者大德大功之人天子
尊之公侯之爵殊其奉養之方功厚者享亦厚德長者
報亦長推之四海之內入為公卿出為牧伯盛不過數
十土地所育人民所藏其貨易供其財易當然報非天
子之獨私焉蓋天下皆樂其有以報也故其民賢者勉
焉以修其業愚者雖甚欲焉而無敢望其志易平其勞

易償今高貨大姓之家列肆侷於府庫邸第羅於康莊
金紺采綴鍤劇焜煌被以黼繡裹以雕牆狗馬棄齊民
之食飲輿妾賤士夫之衣裳賓昏祠葬隳敗紀綱通吏
賣法陰淫陸梁其憑荒負險之民擅彌山絡野之彊畜
奴如兵占田論鄉主逋秦寇者攸衆寶龜藏甲者為常
州縣徒史私為之視察鄉亭部夫公隨之奮攘是天下
山林之出除公上之賦守令吏寺略有常制每郡每邑
宛轉糜潰輸幾侯而幾王彊桀相師極欲為威怒網而

川貧笑斧而林飛孰察諸刊剝水火之遺製孰恤乎堅
穉曲直之所宜積之徒多而器用殊寡舉之或遠而民
資自疲富者售之益輕貧者勞而愈微誓窮原數之饒
而况膏腴之歸乃方乃州或蝗或饑民以為災而彼反
為宜從是其氓匿稅并田之不暇益令羣猾藏租隱地
之無疑南方諸山非復昔時材不愛而木不蕃畋不時
而獸不滋迨有千里不毛裹餓莫支是天地陰陽晝夜
長養猶不能以克其欲則吾民何負獨為狸而畜雞蓋

馭民無予奪之政厚生無發歛之期萬物失由儀之道
四海廢崇丘之詩或者縣官列膠幹皮羽之須營棟宇
舟車之材上苛之以敲笞下撓之以追催索之於邇則
此既莫有求之於遠則險孰能來方此之時踴蓄之家
驩相比朋固所以制百姓之命暮年而篡其業更歲而
竭其財如是不已饑寒怨愁不委於溝壑則聚為盜賊
非此二者吾不知其安所為哉始於傷財則終於害民
察其蠹國必固乎亂俗故國家以皇祐之版書較景德

之圖錄雖增田三十四萬餘頃反減賦七十一萬餘斛
由是言之土地財利名制約束不用先王之法其為弊
也民失其平若之何而可復高者愈貪而肆蛇豕下者
抵禁而趨口腹刑罰日增裁害日續蓋兼并不去不足
以語政制度不立不足與言治禁錫存省米之說賤肉
有愛牛之意此言雖小可以推類事為之法物為之制
數罟之得非不多也先王禁之以其傷生原蠶之利非
不博也先王禁之以其害氣果實未熟木不中伐用器

不中度禽獸不中殺鬻於市者執而有罰不以其時不順其教捕一禽折一草謂之不仁斷一樹伐一木謂之不孝公卿大夫羣士黎庶居室有品器械有度車馬有等衣服有據飲食有常味人徒有常數戮民不敢服絕君子不履絲屨為農者不得為工為工者不得為賈天王之尊也合圍猶惡其盡物諸侯之貴也殺牛尚戒於無故小既無越大豈容負草木鳥獸而舜以命益水火土穀而堯以任禹名山大川縱封國而不盼至其漆林

獨二十而征五著於後王修之愈明典之於天官圖之於地卿任之九職之事辨其五物之征主山而有虞主林而有衡中士下士贊其政令府史胥徒頌其所行豺祭而弓矢陳隼擊而罽羅與司險達其道路山師辨其物名鷙獸在前穴氏火物而誘之出阱獲既設冥氏伐鼓而使之驚然後萬民隨之詔焉以程斬材者有期月竊木者有常刑至於金玉錫石州人之專取犀象麋鹿角人之所登率避其孽育以待其豐成必以其時素王

稱其大順不可勝用孟軻陳其養生貴賤有差六器五
輅之資民得而無所用興造不妄五金六材之屬民用
而無所傷禁發之有期重輕之有常天生時而寒暑平
地生財而品類昌碩以盆鼓蕃以谷量暴暴如山岳渾
渾如河江山出銀甕丹甌榭聚麒麟鳳凰追前世之盛
被於此時以吾君之聖方諸先王陶唐之二宮姚虞之
總章商人之重屋周人之明堂雖龐眉耆耆愛惜朝夕
期有以必覩也子之言曾何比今於漢唐陛下慈仁如

天廣厚如地任臣則勿疑聞諫而必喜賞罰不濫切愛乎民命祭祀罄虔動交乎天祉遠民之弊雖守臣不知而知之甚詳克己之誠在匹夫難行而行之甚易至若五帝憲老之典三王觀風之制六典建官之法三適進賢之例患有司不得其術不患朝廷之不行患有臣下不舉其職不患信任之不至今也輔相大臣左右良士重君子為臣去就之節思古人得君功烈之致施以善俗為本學以力行為貴居朝廷不以先後守其嫌守藩鎮

不以內外疑其勢同德一心齊力協議皋陶謨而矢契
稷之業伯夷讓而中夔龍之志以其察天下之善不使
有益虛驕士之黨以其收天下之傑不使有妒功蔽賢
之吏以衆人之耳為耳聽衆人之所不聽以衆人之目
為目視衆目之所不視授百司因革於吏而總其成績
委二邊軍賦於將而責其必治法制素具東南既饒天
府宏壯訓練有時吳越皆霸王之兵朝令乎西西納十
四州之地夕使乎北北歸十三州之城渾然臨之以至

健隕然載之以不傾伊洛之水盡乎其前戎狄畏之踰
黃河之湍丘垤之山簣乎其旁戎夷阻之甚太行之橫
與其邀近功於一山增衆糶之弊牽危疑於往代浼因
循之名使王者之興百有餘年神聖在位而仁愛之澤
獨未及於禽獸草木曷可同世而語哉二客離席跼蹐
媿謝不敏請為弟子既而少進曰問阜財得阜民之法
問治山得治國之風且昔者將大有為之君必有所不
召之臣欲有謀焉則就之不得已而後起有學焉而後

臣者必不可得而臣者今山之隱逸亦如是而後至乎
曰莫可得而知也神農之於悉諸黃帝之於崆峒顓頊
之於緣圖高辛之於柏招帝堯之於務成帝舜之於尹
壽禹之於國先生湯之於伊尹文王之於鬻熊武王之
於尚父周公之於虢叔齊桓之於管仲然尊德樂道說
者如此也吾觀之彼數子者之心將如是而已乎莫可
得而知也二客悅若自失再拜而罷

龍虎臺賦

明劉基

猗歟太行之山呀雲豁霧結元氣而左蟠於赫龍虎之
臺摩乾軋坤魁羣山而獨尊其背崔嵬突律森岡巒而
拱衛其勢則崑崙駸駸仰星辰之可捫白虎敦圉而踞
峙蒼龍蜿蜒而屈盤狀昂首以奮角恍飈興而雲屯其
北望則居庸截嶠煙光翠結攢峰列戟斷崖立鐵跋烏
飛而不度古木樛以相掣其下視則漲海沖融飛波洗
空風帆浪舶往來莫窮想瀛洲之密邇睇三山之可通
彼呼鷹戲馬適足彰其陋而眺蟾望鵠曷足逞其雄豈

若茲臺之不事乎版築而靡勞乎土功也想其歛釜碣
礪曼衍迤邐形高勢平背山面水巨靈獻其幽秘歸邪
護其光晷何嵩華之足吞豈岱宗之可擬此所以通光
道於上都揭神京之外壘匪松喬之敢望羌乘輿之攸
止也至若四黃既駕鹵簿既齊方玉車之萬乘蔚乎翠
華之萋萋載雲罕與九旂光彩絢於虹霓山祗執警以
廣道屏翳灑雨以清埃朝發軔於清都夕駐蹕於斯臺
明四目以遐覽沛仁澤於九垓眇軒轅之梁甫肩神禹

之會稽雄千古之盛典又何數乎方壺與蓬萊慨愚生
之多幸際希世之聖明雖未獲覩斯臺之壯觀敢不慕
乎頌聲遂作頌曰傑彼神靈在京之郊金城內阻靈關
外包上倚天倪下鎮地軸太行為臂滄海為腹崇臺峩
峩虎以踞之羣山籠從龍以翼之於鑠帝德與臺無窮
於隆神臺與天斯同崇臺有偉鸞駕爰止天子萬年以
介遐祉

龍虎臺賦

明江字

吾聞幽都之山崔嵬嵩嶽窮方紆鬱幾萬里兮挾居庸
之南出壯乾坤之險阻兮開混沌之端倪滴龍盤而虎
踞兮屹高臺之巖岬右太行之峩峩兮左江海之湯湯
負天關之巔肩兮面紫極之清光觀夫臺之為狀也則
博敞倜儻朝昏來往嶽岑參差日月蔽虧軼陰雨於太
半俯星辰於下墀溘氛埃而軼浮景兮出凌兢而入太
微吾亦不知其高廣之若是兮蓋天地之所為若乃峻
增截薛撐鱗奮鬣周迴連蜷蜿蜿蜒蜒林蒸潤而雨降

崖轉石而雷喧勢將騰海水而噴薄鼓顛氣而飛天吾
是以知臺之所以名龍神變化而無前至若嵌巖豁硤
有呀其牙孱顏峯窾而爪而攫春花明而文炳飛泉咆
而慄魄衆山奔騫於其下兮若百獸震掉披靡而前却
吾是以知臺之所以名虎雄萬古而磅礴爾其季春歷
日法駕北巡五輅輝煌萬騎紛紜鸞旗鳳蓋之粲麗金
干玉戚之晶熒警蹕既啓天顏甚邇散皇風以矚幽考
聲教之所被吉行信宿於焉而止喜地勢之高平縱登

望之苑苑乾心降而徵怡都人仰而稱偉於是名臣良
士朱虎夔龍迷清颺於有土虛元氣於太冲鼓舞六合
奮躍羣雄出淵潛之滯跡起巖穴之幽蹤吾又知夫臺
之所以名龍虎不獨山川之勝又快夫風雲上下之相
從也嗟夫威加四海知霸心之猶存直計百金昭儉德
之為至圖功業於丹青致獲良於千里是雖可以壓銅
雀而下姑蘇又豈足以並茲臺之美乎歌曰瞻彼層臺
聿穹窿兮肇基太始垂無窮兮爰考休徵熙淳風兮於

昭靈臺與俱崇兮

愚公移山賦

唐丘鴻漸

止萬物者艮會萬靈者人艮為山以設險人體道以通
神是知山之大人之心亦大故可以議其利害也昔太
行聳峙王屋作固千巖糾紛萬仞迴互蓄冰霜而居夏
凝結源流聯而飛泉積素爰有諄諄愚叟面茲林麓愴
彼居之湫隘懲祁寒之慘毒激老氏之志且欲移山當
算亥之年寧憂就木乃言日月無私照也山則蔽之春


夏無伏陰也山則藏之傾阻我比屋擁隔我通達我將
拔本塞源使無子遺得則為功之美否則為身之恥終
當詒厥孫謀施於翼子於是協室而一乃心力荷擔而
三夫傑起畚斲斯備其功聿修于澗于沼爰始爰謀一
之日土墾石鑿二之日崩崖隕壑三之日夷峰彌壑雲
林摧以蓋偃火石迸而星落爾其洞穴堙塞陰陽以行
交錯飛禽走獸魄褫氣懾而不復巢居穴託王喬偃佺
低徊頻蹙而無所駭驚駕鶴山神操蛇聞之乃壯其功

深其計將懼不已先謁於帝命夸娥二子發神威振猛厲始將怒目決背終欲颺舉電逝遂乃斡碣莽挾崔嵬下拔乎三泉上衝乎九垓突兀雲動磅礴天迴遽投雍朔而不復來世人始知愚公之遠大未可測已夸娥之神力何其壯哉儻若不收遺男之助荷從智叟之辨則居當困蒙往必遇蹇終為丈夫之淺今者移山之功既已成河冀之地又以平則愚公之道行客有感而歎曰事雖殊致理或相假多岐在於亡羊齊物同於指馬我

修詞而忘倦彼移山之不舍吾亦安知夫無成與有成
諒歸功於大治



御定歷代賦彙卷十七



總校官庶吉士 臣張能照

校對官編修 臣馬啓泰

謄錄監生 臣張 桴

欽定四庫全書薈要

集部

御定歷代賦彙卷十八
九

詳校官候補通政司經歷臣郭祚熾



御定歷代賦彙卷十八

地理

終南山賦

漢班固

伊彼終南歸截嶙峋絜青宮觸紫宸欽崙鬱律萃於霞
芬暖暉晦靄若鬼若神傍吐飛瀨上挺修林元泉落落
密蔭沉沉榮期綺季此焉恬心三春之季孟夏之初天
氣肅清周覽八隅皇鸞鶴鶩驚乃前驅爾其珍怪碧玉

挺其阿密房溜其巔翔鳳哀鳴集其上清水泌流注其
前彭祖宅以蟬蛻安期饗以延年唯至德之為美我皇
應福以來臻埽神壇以告誠薦珍馨以祈僊嗟茲介福
永終億年

登吳嶽賦

以崇巖險固永鎮西疆為韻

唐周 鉞

吾嘗文戰將北羈遊極西覩吳嶽之孤峭計羣山之莫
齊由是邈崖谷遂攀躋入雲靄出塵泥既臻頂上用視
天倪鴈塞殊小峩矚甚低蓋以氣壯神扶雄標國祚揖

白帝兮不見抱皇城而自固嵐光擁翠拓開霄漢之心
岫色橫空鎖斷戎夷之路帶嶠旁竦岩窈上千碧草春
含清風夏寒遙瞻魏闕迴立煙巒疑超洞府謂在天壇
中隱深溪日月之光不到外連層阜龍蛇之勢斯蟠當
其區宇正寧氛埃初見覽造化之宏制識乾坤之設險
汧水縈盈而線走隴山崩竈而螺掩西窺劒閣霜地表
之千鐔東瞰蓬萊黛波間之數點遐徵衆嶽式並隆崇
彼皆受封於百代此獨不視於三公森筍立以削成寧

慙太華黯雲凝而化出豈讓維嵩况乎萬仞凌虛千里
倒影虎踞華裔鯨吞虜境疊巘攢壁迴巖列屏捍絕域
以增隘固中原之甚永直使以禮賓九有仁服八荒臂
賢以為輔弼宅道以作封疆亦須假我嚴衛憑我巨防
邇藩垣於都邑遠隔闕於氐羌吾唐重其功崇其鎮爰
升成德之號用補極天之峻小儒是以竟日興感抽毫
賦韻登詠畢兮嶽岑指長安而後進

三門賦有序

唐趙冬曦

砥柱山之六峰者皆生河之中流蓋夏后之所開鑿其
最北有兩柱相對距崖而立即所謂三門也次於其南
有孤峰揭起峰頂平闊禹廟在焉西有孤石數丈圓如
削成復次其南有三峰東曰金門中曰三堆西曰天柱
湍水從黃老祠前東流湍激感於蝦石折流而南激於
三門包於廟山乃分為四流淙於三峰之下觝於曲隈
會流東注加以兩崖夾水壁立千仞盤紆激射天下罕
比時以內兄牛氏壯而遊焉相顧賦之以紀竒跡

大河瀰漫上應天漢濬靈波於積石之西瀑懸流於崑
崙之半茫茫禹功茲焉會同鑿連巖而瀉湫羅嶠島以
攢空闊兮若橫兩闕於江上岌兮若稜三山於海中崇
山嵌窞呀水淙射左右飛濤起伏相擊截奔湍兮躋石
臺目霍濩兮心徘徊三峰砥其却立架崇門以洞開連
嶂紆河以壁峭疊巘喬空而半頽洪流感折以全涌漱
湍窞窞而相礮苞巒秘隙砮其鼓作徧衆澎瀑灘以山
摧奔濤迅復紛其蕩駭蓬渤滑湓霍以雲迴盤渦窅窅

以谷施奔石砰磕以成雷拗怒未洩橫流逆折合如地
轉散若天裂搖騰碧嶼屐蕩珊穴硤巖腰而沫沸淙隘
口而湍咽然後澡雲霽霽收濤卷瀨汨汨以無聲漫
浩浩以東會總四流而混合注三穴而滂沛泛洪連於
大磧之東薄餘怒於天地之外當其時也山獸驚躍水
禽亂飛魚獺沉潭以不動獐獐拱樹以相依竄蛟人於
洞壑帖舟子於漣漪莫不愁白鷺之初下歎黃牛之暝
歸若乃降望金門懷祥石背窮巖萬仞一曲千里松歷

歷而生涯草髮髮而覆水雲蓬茸兮歷地生風颼颼兮
百籟驚猿惜暮以悲叫鳥辭春而不鳴貼嶠岵兮杪崢
嶸飛客心兮動客情憐石菌之冬茂賞瑤芝之夜明惟
夏君兮永螫拜靈廟兮何及棖梁古兮山鳥棲階壁蕪
兮野龜入感微禹之歎深亢幽歌以佇立歌曰申負石
兮空自竒客乘查兮何遠為君不見虛舟之泛泛浩乘
流而不羈

禹鑿龍門賦

以利濟生人功
存聖德為韻

唐陳山甫

控引河源鑿山為門闢兩崖而龍蟠虎踞飛一帶而電
激雷奔所以拯流離於品物佐含育於乾坤邈矣而高
蹤斯在巍然而詭狀斯存昔夏王披簡援圖盡力溝洫
萬方附會以恭命百工子來而奉職畚鍤具而勢感風
雲巖岫分而狀成閶闔波濤有路無非汲引之功鱗介
攸居咸被生成之德異夫屹爾崖巘張為閘闕懸流赴
勢以中注巨石乘危而下傾拉叢林而山靈叶贊迴大
壑而水怪奔驚故凝滯者得以流其惡昏墊者得以厚

其生當其相地所宜兆人攸利山崢嶸而洞啓水噴薄
而俄至湯湯浩浩俱成畎澮之流原隰陂池皆為生植
之地道邁前古芳流後塵豈不以開濟之功莫大通流
之用如神龍躍新渚魚迷舊津四載之勞終成於舜日
九年之患空媿於堯人始也設以規模不資鈐閉雲橫
結駟之狀浪走高車之勢廣濫觴之運水無不通禪造
化之遺人無不濟茂績崇崇與流無窮豁宕堯而分遠
碧來浩渺而寫晴虹不媿錫圭之命寧慚拓土之功是

以義軒等美唐虞齊盛故當輝燦於帝圖不然何以應
千年之聖

底柱賦

有序

明唐肅

按底柱在冀州大河中流禹導河自積石至于龍門南
至于華陰又東至于底柱然後至孟津週洛汭而復北
折焉蓋河自龍門既決以來奔騰迅快勢不可遏至是
而齟齬之乃分為四流貫於三門之下然後力殺而行
緩故酈氏水經謂底柱與龍門皆禹所疏鑿也昔蘇子

瞻賦濫頽堆以為蜀江會百水而至於夔瀾漫漶瀚橫
放大野而峽之小大曾不當其什一苟無是堆則瞿唐
之險當不啻此余謂砥柱之功亦有類於濫頽者故述
而賦之賦曰

黃河之流西來數千里兮貫長城而南馳激龍門之險
阨兮霆奔電馳氣洶湧而莫支歷華陰而徑趨兮乃折
流而東下勢若萬騎銜枚而疾走兮將悉鋒盡銳鏖戰
於平野何砥柱之崔巍率律兮獨凝立乎中流儼一夫

之當關兮強兵悍卒睥睨退縮不敢運其戈矛惟崇伯
子之敷土兮導洛洞而平之鑿茲山以疏洩兮剖三門
之欽熾然後洪波巨浪齟齬而不騁兮分流析派間度
以逶迤指孟津而逾洛汭兮遂東極於大邳苟非是以
中梗兮曷以殺天吳水伯之淫威余嘗駕方舟而遠求
古蹟兮誓將豁心胃於浩蕩過黃老之神祠兮溯蝦石
之決瀆睇連天之修楹兮干雲霄而直上濁波汨汨包
其下兮顯神功於俯仰使昔懷襄之莫救兮匪四海為

一區上巢下窟之赤子兮殆皆戢以為魚覽斯險而嘅
歎兮雖天造而地設微玄聖之大智兮孰能成夫萬世
之烈彼蜀江之濫瀕兮羌地勢之所同誦金聲於儋叟
兮信物理安危之所從噫吁噫世道降兮風移而俗媮
頽波汗漫兮忌剛而茹柔魚蝦鼓舞兮蛟龍鬱愁豈無
吾人之砥柱兮障百川之橫流

首陽山賦

漢杜篤

嗟首陽之孤嶺形勢崛其盤曲面河源而抗巖隴埵隈

而相屬長松落落卉木蒙蒙青羅落莫而上覆穴溜滴
瀝而下通高岫帶乎巖側洞房隱於雲中忽吾覩兮二
老時採薇以從容於是乎乃訊其所求問其所修州域
鄉黨親戚匹儔何務何樂而並茲遊矣二老廼答余曰
吾殷之遺民者也厥胤孤竹作藩北渚少名叔齊長曰
伯夷聞西伯昌之善政育年艾於黃耆遂相攜而隨之
冀寄命乎餘壽而天命之不常伊事變而無方昌服事
而畢命子忽覩其不祥乃興師於牧野遂干戈以伐商

乃棄之而來遊誓不步於其鄉余閉口而不食並卒命
乎山旁

首陽山賦有序

晉阮籍

正元元年秋余尚為中郎在大將軍府獨往南牆下北
首陽山賦曰

在茲年之末歲兮端旬首而重陰風飄回以曲至兮雨
旋轉而纖襟蟋蟀鳴乎東房兮鶡鴒號乎西林時將暮
而無儔兮慮悽愴而感心振沙衣而出門兮纓綏絕而

靡尋步徒倚以遙思兮喟歎息而微吟將修飾而欲往
兮衆蘂蘂而笑人靜寂寞而獨立兮亮孤植而靡因懷
兮索之情一分穢羣偽之射真信可實而弗離兮寧高
舉而自濱聊仰首以廣頰兮瞻首陽之岡岑樹叢茂以
傾倚兮紛蕭爽而揚音下崎嶇而無薄兮上洞徹而無
依鳳翔過而不集兮鳴梟羣而並棲颺遙逝而遠去兮
二老窮而來歸實囚軋而處斯兮焉暇豫而敢誅嘉粟
屏而不存兮故甘死而採薇彼背殷而從昌兮投危敗

而弗遲此進而不合兮又何稱乎仁義肆壽夭而弗豫
兮競毀譽以為度察前載之是云兮何美論之足慕苟
道求之在細兮焉子誕而多辭且清虛以守神兮豈慷
慨而言之

黎陽山賦

魏
劉楨

自魏都而南邁迄洪川以竭休想王旅之旌旄望南路
之遐修御輕駕而西徂過舊隰之高區爾乃踰峻嶺超
連岡一登九息遂臻其陽南陰黃河左覆金城青壇承

祀高碑頌靈珍木駢羅奮華揚榮雲興風起蕭瑟清冷
延首南望顧瞻舊鄉桑梓增敬慘切懷傷河源汨其東
逝陽鳥飄而南翔觀衆物之集華退欣欣而樂康

葛嶧山賦

□ 周 誼

有客駕白雲控蒼蚪慕南華之竒覽效子長之遠遊爰
駐節於圮上睇羣山之夷猶但見峭壁崙嶽巖崩削方
壓厚土之鴻龐摩圓靈之危仄對羊岫之間雲瞻蛤湖
之落日雖無鄒山之秀麗亦有龜蒙之介直左沂水之

湯湯右泗流之瀟瀟古冢隱兮蟻封浮屠屹兮人立仙
翁釋子來往乎其間蚪松鳳竹森列乎其側凌氣勢於
寒高曾不讓乎秋色客乃悠然而思曰茲非所謂葛嶧
山者乎蓋不知幾千萬尺也於是履崔嵬躡稜層涉汗
漫倚空冥發孤嘯於雲端覽八極於雙明觀其平原莽
蒼灘水汪洋折戟沉沙衰草斜陽亞父之孤壙兮瀟灑
戲馬之層臺兮荒涼泣鬼魅於青燐走狐兔於白楊此
楚漢之戰場也若夫雲收翠燼煙斂青巒如龜趺而鳳

翼若虎踞而螭盤為樂器之所需枕泗濱而巔岼此則
石磬之山也若乃斷橋蕪沒蝸石毀圮赤松久仙陸沉
遺履懷往事分千齡歎浮雲之流水茲非漢黃石公授
書之故址者邪爾其丹青剝落龜石淋漓茨階蟻穴蘚
壁蛛絲列槎牙兮劍戟望翁仲兮獻歎悼賢侯之久逝
遺父老之深思茲非所謂漢淵德公之舊祠者邪已而
牛羊被野夕陽下山泉湧谷響風烈雲漫客乃返乎圮
上遇一仙翁羽衣鐵冠問於客曰岼山之遊樂乎子但

知一時之樂而不知數千載之下獲耕桑之利被衽席
之安者果孰為之功邪在昔鯀湮洪水九州為魚天命
神禹濬距導瀦淮沂其乂徐野無虞肇茲山之得名迺
表出於奧區拯生民於墊溺賜萬世之奠居子曷不心
神禹之遺蹟展白雲而賦諸客曰唯唯翁步雲衢客乃
作歌以繫之曰山蒼蒼兮凝煙水汨汨兮流川念明德
兮既遠懷禹功於當年我聖皇之御極兮恢輿圖於萬
里地平天成兮神禹同軌名山大川兮我疆我理壯哉

岨山兮雄鎮徐址

望嶧山賦 有序

元 吳師道

友人黃君晉卿向嘗為余言鄒縣之境東望嶧山峭然
孤起孟子實生於是可想見其人焉余過其地睇瞻興
懷信斯言之有徵因賦以道之其辭曰

濟重江而北征兮漫千里之平陸過邾婁之故墟兮極
東鄉以騁目羣山委蛇而奔湊兮青遙遙其相屬翠峻
峰之孤起兮儼雄踞而特尊絕浮雲而上出兮俯培塿

其無鄰曰茲惟東魯之嶧山兮實岱宗之陪輔杳日觀
其猶未覲兮乃獨快茲先覩表積石之嶙峋兮却朽壤
而弗附勢絡繹而繇延兮宜著名於終古惜行邁之靡
靡兮盼遼邈而不可登披圖牒而考稽兮嘉詩書之所
稱神禹定其職貢兮繫孤桐之挺植魯侯荒於大東兮
遂保有以為域彼祖龍其何知兮窮萬里之轍迹升遐
巔而頌功兮斯獻諛而助賊咸陽既已飛灰兮野火宜
不赦夫頑石侈心忽其安在兮惟樹德之罔極吾獨羨

夫山川之精英兮微聖賢其孰當偉孟氏之特起兮在
戰國而堂堂氣浩然而剛大兮壓后土而蟠穹蒼雖擬
聖之有迹兮邈餘子其奚敢望屹茲山之猶故兮信並
立而俱長微余友之昔言兮羌有懷而不見悵欲語其
誰同兮徒激昂而增歎

蒙山平野亭賦

金劉文蔚

琅琊古郡海右雄藩介青徐之遐境跨蒙羽之名山按
經圖兮歷二千年之城郭詢父老兮曾十萬戶之廛闐

嗟繁華逝而不返兮久瀟灑於兵革之殘追前賢創造
之遺跡兮認舊碑剝落之苔痕一臺存於公署之左兮
其勢俯瞰東北之城垣寂寂兮瓦礫之墟森森兮荆棘
之攢昔郡守備邊之未暇兮其來亦孰為之一觀越至
元之己卯屬大統之中原太守以善政而底譽監司由
上考而來官乃因政之暇乘農之間且陶且冶載伐載
刊役不兩旬而既畢用無百姓之所關崇峻峭拔兮葺
故基於九仞輪奐輦飛兮構新亭之十間眠其下也綠

樹漫漫市井班班葺宇參差兮鱗次車馬彷彿兮往還
靄萬竈之炊煙兮隔物我以仙凡忽一掃其風埃兮驚
夢寐於塵寰流好音兮幽鳥生繞砌兮芳蘭棲朝雲於
畫棟堆野色於危欄忘萬事之紛擾覺六月之微寒鷺
孤飛於霞際兮疑星轉乎天端鷗羣集於沙上兮若波
起乎平灘不雕不畫兮入雲煙之清雅無陰無晦兮極
村曲之縈盤每公餘而自適縱却顧而前看一帶高深
兮山水秀千里沃壤兮邦畿寬莫不豁詞林之風月瀉

留次之波瀾若夫與客共飲因公置煩列雲霄之雅聽
促玉漏之清彈倒鯨杯而吸翠發酣歌而怡顏懷古人
之興感豈賞心之易闌非不知役不可兮難舉事不可
兮尚繁蓋賢者之所作能勞民於既安况乃輸之以道
兮人得其歡使之以時兮孰憚其難不徒宴樂於此兮
欲坐觀乎稼穡之勞庶幾知民之艱也

蒙山賦

明 梁 寅

維堪輿之奠位斯山嶽之肇形類波濤之激蕩擁泥沙

之峻增為嶠為岑或丘或陵尊若帝王陪以公卿然人也以山而鍾秀山也因人而著稱在於荒陬雖崇而隱邇乎雄都雖卑而名竊愛夫蒙嶺之鎮吾地其餘終南少室天台會稽何彼重而此輕也哉觀其勢雄千仞根盤百里崖竅欽窞蜿蟺窈窕竅以諸洞界以衆水巖壑鱗鱗崖石齒齒疆域之表郡國之紀阜嶂東迴春臺西峙黿峰北聳渝流南迤其為寶藏則白金之璀璨碧鈿之璘璠表炎方之奇產克天府之上珍其為靈蹤則金

剝據其陽仙巖在其顛森祇樹於翠谷闕小有於洞天
若乃瑤草掬芳珠林挺秀風篁球夏煙羅幃覆蘭茝綠
於徑阪芝朮產乎嵌竇長陰澗之茯苓絢霜林之橘柚
猿猱哀嘯能罷怒咆霧臥文豹湫吟黑蚪揚夜鶴之遙
音露秋鶻之懸巢過客眩於妖狐樵子駭乎山魃凡其
根莠之品飛走之族時榮時悴以涵以育富於靈圃之
駢羅夥於陸海之儲蓄博物之張華無以辨其類洽聞
之郭璞曷能究其目宜夫絕俗貞士離世潛夫悅雲霞

而長往與麋鹿以為徒翫岡葩之春媚樂岑木之夏敷
吟素秋於月觀度玄冬於雪廬坐紫苔兮綠綺奏陰蒼
松兮芸帙舒或茹芝兮白日晏或埽葉兮涼飈隨想夫
楚叟之賢栖山之陽躬尚稼穡志輕侯王觀山泉之泓
渟悟蒙養之端莊愜閒情於濬壑杜妄轡於巖廊嗟軒
堯其既遠顧沮溺其可望勵雅操之冰玉謝溷世之糝
糠疑斯人之或遠復東瞻乎魯邦既異世以同趣宜隨
地而安常吾將稅俗駕屏塵心企潁陽懷箕陰朝與山

兮為儔夕與山兮相尋濯纓松下流振衣雲中岑寧抱
甕以自勞賦歸來而長吟歷萬里於至近返千齡於方
今庶永託於茲山嗣高士之徽音

登虎牢山賦

晉潘岳

辭京輦兮遙邁將遠遊兮東夏朝發軔兮帝傭夕結軌
兮中野馮修坂兮停車臨寒泉兮飲馬眷故鄉之遼隔
思紆軫以鬱陶步玉趾以升降汎水而登虎牢覽河
洛之二川眺成平之雙峯崇嶺巖以崔嵬幽谷豁以窅

寥路逶迤以迫隘林廓落以蕭條爾乃仰蔭嘉木俯藉
芳卉青煙鬱其相望棟宇懷以鱗萃彼登山而臨水固
先詰之所哀矧去鄉而離家邈長辭而遠乖望歸雲以
歎息腸一日而九迴良勞者之詠事爰寄言以表懷

廬山賦

宋 支曇諦

昔哉壯麗峻極氤氳包靈竒以藏器蘊絕峰乎青雲景
澄則巖岫開鏡風生則芳林流芬嶺竒故神明鱗萃路
絕故人跡自分嚴清升仙於玄崖世高垂化於邛亭應

真陵雲以踞峰眇忽翳景而入冥咸豫聞其清塵妙無
得之稱名也若其南面巍崛北背迢遰懸雷分流以飛
湍七嶺重嶮而疊勢映以竹柏蔚以檉松榮以三湖帶
以九江嗟四物之蕭森爽獨秀於玄冬美二流之潺湲
津百川之所衝峭門百尋峻闕千仞香爐吐雲以象煙
甘泉涌雷而先潤

望匡廬賦 有序

唐 李德裕

滄湖口北望匡廬二山影入澄潭峰連清漢江水無際

煙景相鮮沿流而東若在世表因懷遠公陸先生悵然
成賦

春水湖平霽天景旭眇赴海之清瀾映干霄之翠嶽波
鱗爛而勢微帆鴈引而相續輕煙冒於爐峰若香散於
空谷飛流灑於星灣疑虹飲於曾曲想遠公之平昔比
孟綽之不欲談精義於松間寄虛懷於巖足喜濯纓而
旋返悲負鼎而放逐恥隨屈賈之波不同宗雷之躅整
襟帶於瑤席望玄師於林麓徒佩紫青之書未脫朱丹

之藪感明王之嘉惠荷天地之覆育既復扶陽之爵又
剖專城之竹被金組於薄躬昭皇明於荒服豹文忽變
蔚然以姿蟬綏更新倏然而脫雖澡身於滄浪終有媿
於玷辱念大福兮不再來歸東臯兮供黍粟

匡廬賦

明胡儼

昔神禹之疏鑿兮奠山川於九區惟彭蠡之既瀦兮渺
巨浸而為湖爰有山而西峙兮儼穹窿而覆廬彼何人
之昆季兮初卜居而宅其陽詢遺老以求其故兮傳其

姓而曰匡於是招五老於雲中兮參九真而翱翔攬香
鑪之紫煙兮濯飛瀑於石梁挽銀河於九天兮凌倒景
之蒼茫雙劍倚長空而嵯峨兮凜肅肅之秋霜倚龍淵
於絕壁兮瀉碧澗之琅琅漱玉挺乎長松兮嘒故址之
荒涼埽蘚斑而求古跡兮信德美其流芳歟凌風而遐
舉兮抵尋真之舊觀逕松蘿而尤竒兮覩雲屏之煥爛
天宇豁其澄鮮兮聳層巒於霄漢水簾三疊而下垂兮
儻瓊飛而珠散羌觸坎而轂轉兮懸素絲於天半迴風

搏而混結兮炯雪球之洞貫邀謫仙於松巢兮扣東林
之禪扃倚三笑而長吟兮聽虎溪之泠泠升上方而登
天池兮跨絕頂之高寒靈籟發而淒清兮悚萬壑之驚
湍鶯啣嚶於幽谷兮猿悲嘯乎巒岼熊咆龍吟之不可
以久留兮接空明之羽翰巨艦突而撐空兮何神化之
渺漫披蒙茸而陟虎豹兮仰石磴而高騁坐飛閣而延
覽兮付江山於一瞬紅葉忽其翩翩兮猶雨花之亂墮
訪竹林之古寺兮云隱顯之靡常流鐘磬於巖竇兮顧

杳靄兮何鄉俯盤盤之深谷兮綺繡錯而錦張過淵明
之栗里兮三徑沒而已荒挹高風於千載兮攀逸駕於
羲皇余思夫古人而不得見兮撫孤松而彷徨望白雲
之悠悠兮覽紫霄之蒼翠迎鸞鶴於空中兮驂羣仙之
環珮臨墨池以揮灑兮希右軍於絕代酌鸞溪之一滴
兮亦何有乎滯礙道簡寂以遨遊兮仍羽人於丹丘陸
子肅余於石壇兮耿星河之欲流余既縱夫玄覽兮羌
回車以復路度松關之迢迢兮問棲賢之故處乃少室

之山人兮甘嘉遯而來居抑後賢之仰止兮藏簡冊於
輿區振吾袂於高岡兮扶天風於兩腋鹿呦呦以思苓
兮闖紫陽之遺蹟洞谿訝而隱約兮山幽幽而無人葛
漫漫於樛木兮石磊磊乎澗濱堂構餘乎瓦礫兮恐愁
吟而飢飮呻余既感此而惆悵兮除積翳於榛荒采蘋
繁於沼沚兮就堂階而薦觴退即乎風泉雲壑兮聊詠
歌而徜徉衆既告余以欲暮兮還余駕乎東驚蟬噫噫
而寒鳴兮草萋萋其夕露松陰陰而月朦朦兮渺蒼蒼

之煙霧亂曰汨吾遊兮北征水茫茫兮山青稅吾駕兮
匡廬訪古蹟兮窮奧區山之人兮潔修跨黃犢兮夷猶
灑清風兮六合凜冰玉兮高秋歸來山人兮林丘

白鹿洞賦

宋朱子

承后皇之嘉惠宅廬阜之南疆閔原田之告病惕農扈
之非良粵冬孟之既望夙余駕乎山之塘徑北原以東
驚陟李氏之崇岡揆厥號之所繇得頽址於榛荒曰昔
山人之隱處至今永久而流芳自昇元之有土始變塾

而為庠儼衣冠而絃誦紛濟濟而洋洋在叔季而且然矧休明之景運皇穆穆以當天一軌文而來混念敦篤於化原乃搜剔乎遺遯分黃卷以置郵廣青衿之疑問樂菁莪之長育拔雋髦而登進迨繼照於咸平又增修而罔倦旋錫冕以華其歸琛亦肯堂而貽孫悵茂草於熙寧尚茲今其美論天既啓余以堂壇友又訂余以冊書謂此前修之逸迹復關我聖之宏模亦既震於余衷乃謀度而咨諏尹悉心以綱紀吏竭慮而奔趨士殫經

而敦事工殫巧而獻圖曾日月之幾何屹夏屋之渠渠
山蔥龍而遠舍水汨瀟而循除諒昔人之樂此差異世
而同符偉章甫之峩峩抱遺經而來集豈顓眺聽之為
娛實覲宮牆之可入媿余修之不敏何子望之能給矧
道體之無窮又豈一言之可緝請姑誦其昔聞庶有開
於時習曰明誠其兩進抑敬義其偕立允莘摯之所懷
謹巷顏之攸執彼青紫之勢榮亦何心於俛拾亂曰澗
水觸石鏘鳴瓊兮山木萃萼枝相樛兮彼藏以修息且

遊兮德崇業茂聖澤流兮往者弗及余心憂兮來者有
繼兮我將焉求兮

白鹿洞賦

次晦翁韻
有序

宋方岳

晦翁先生去洞之六十有九年其里中學子方岳幸得
主藏書徘徊顧瞻有慨其歎蓋歲行之無幾而世變已
不古矣乃次翁韻為白鹿洞後賦招我同盟而歆之其
辭曰

始余眇眠鹿之町疇界白雲以為疆嗟五老人者之無

恙獨有覲於二千石之維良朝余樂兮紫陽夕余夢兮
朱塘訊風泉與雲壑勞降嘯而陟岡慨夫子其未遠寧
吾道之易荒言琅琅以猶在將彌久而彌芳皇拊髀其
永懷一天視於帝庠倬雲漢之昭回紛恩溥而德洋嘻
同盟其念哉毋諉焉於氣運惟命義之是閑豈善惡之
可混與有獲以詭隨盍無悶於嘉遯道烏在乎高深體
吾身其學問將喻利以尺枉抑嚮方而寸進念日用之
常行奚先傳與後倦今來歌而來遊尚及門之子孫匪

執經而問焉誰與歸兮共論余既互鄉之晚生又主藏山之遺書悵莫企乎前修思盡復其舊模疇去籍以紛放肆余度而余諏二三子其來前矩吾今之步趨枕寒流以漱石有書右兮左圖儼老仙之在旁何玉我之勤渠日三省以澡淪時四勿其埽除古之人何人斯而余肯同夫讀書城南之符也駕長風而來思抱明月以翔集毋空谷其遐遺幸聖域之優入以經籍為朋友以泉石為供給佩猗蘭之秋香紉芙蓉而手緝盍歸來乎山

中兌麗澤其講習清斯濯以自潔起風雩而獨立挹煙
雲而進之問孔聖之何執將玉林其與遨期瑤草之共
拾亂曰有鏘其佩琳琅瓊兮風蕭蕭然山川樛兮翁乘
白雲駕言遊兮道斯在斯如泉流兮勿遐爾心為翁憂
兮歸來歸來吾與子求兮

白鹿洞賦

次晦翁韻

明林俊

浮鄱陽之巨浸沂星子之名疆宣啓蓬以遐矚森五老
其孔良懷攬結於神秀維舸艦於橫塘戒征夫以前路

策余馬於山之岡感鑪錘以陶鑄揖真宰於鴻荒嶽東
南以孤峙蒼輶轄於衆芳飫大清於沆瀣又奚慕夫五
更周序而殷庠粵二龍之寄傲睨雲壑以洸洋澹虛止
以超曠幹玄樞以潛運緬元和之羅致竟玉收而硃混
盼鴻鵠以高舉撫白鹿而肥遯迴勸駕於拾遺勞朋友
之敦問羌徒跡於東都憐附章而彙進惟紫陽之肇守
右儒術以罔倦締頽址於荆榛矢繕葺復奚孫飭藏修
於他所揭要領於前論既廣貽夫士廩亦載勤夫御書

儼聖賢於遺像條規範於偉模授紀成於秘閣假休沐
於咨諏振風雩之逸響循孔步而顏趨朗人文於奎曜
恢正學於永圖嚼遺言於敬義恍面語而勤渠悵日月
其滋久洞莽蒼以靡除矐余生之伊晚竊心慕而企符
悼梁木之宿頽偕章縫以後集噫墜緒其茫茫惡德門
之望入幸來復其未遠矧日力其猶給礪鍼石以起痼
豈濂洛閩關之莫緝謹濯雪以刮劇奚弊弊夫末習夙
遵軌以信邁覲百一其有立惟格人之可起委厥鞭其

願執糞濡染於幽馨仰前修於掇拾亂曰聖澤泓澄礫
鳴璆兮雲章煥爛柯蜷膠兮含真嗣徽濛化遊兮爰濯
其纓枕寒流兮衿裾容與樂消憂兮浮雲物外泊吾生
以奚求兮

白鹿洞賦

次晦翁韻

明祁順

粵南康之有郡兮據吳楚之封疆由名賢之過化兮民
俗丕變而淳良村落僻其近郭兮紛隱映乎松塘槩白
鹿之幽勝兮在東北之重岡昔山人託迹於斯兮後復

翦其榛荒臺榭屹乎輝映兮花草鬱其芬芳暨南唐置
學兮曰匡山之國庠降五老之突兀兮吞彭蠡之汪洋
尋大振其聲教兮際宋朝之休運山若增而巍巍兮泉
若濬而混混禽鳥樂以和鳴兮豺虎避而深遯九經於
焉頒賜兮羣士於斯乎講問逮紫陽之興建兮悵然懷
乎先進書有積而田有給兮樂教養之無倦寄衷情於
賦詠兮粲幼婦兮外孫嗣顧斯文其在茲兮豈吾徒之
私論慨斯人不常存兮道猶寓乎遺書矧教條之昭晰

分誠萬世之楷模何喪亂之屢經兮莫圖舊而重諏聖
澤為之下壅兮學徒廢其摠趨幸治教之休明兮屬一
統之皇圖郡侯憲史相繼而修復兮展夙心之勤渠進
諸生以道德兮外聲利而屏除彼垂涎於公相兮陋韓
公之訓符余登臨而假寐兮夢先哲之羣集儼杏壇之
講授兮紛堂升而室入回庶乎其屢空兮雍無事乎口
給點鳴瑟以詠歸兮參省身而傳習踵夫子之步趨兮
歎文王之熙緝呼余前而丁寧以告戒兮欣仰瞻而起

立授余以明誠之要訣兮曰擇善而固執忽驚寤如有
失兮賴片言之可拾仰高山余起敬兮見千仞之蒼璆
攀桂枝以延佇兮羌偃蹇其相樛世有異而心不殊兮
聊想慕以優游夫豈耽山水之為樂兮徒漱石而枕流
願辭榮於宦海兮假林壑以消憂從吾心之所好兮更
於世乎何求

白鹿洞賦

次晦
翁韻

明舒芬

設吳楚之兩界鎮江黃之故疆維匡山之偉觀屹頽波

之忠良迤敷淺於彭蠡懲險東夫瞿塘有阪有隰有澗
有岡歷姚虞而迄周罔或烈而遂荒肆洞天之幽闐鬱
草樹而臭芳終名勝之莫掩肇宮宇而膠庠屬鴻儒之
起廢濟後學之望洋適奎躔之聚輝贊斯文而起運敬
義揭以直指老佛闢而莫混士知方以有來或於焉而
繫遯余茲仰門牆而振衣隸也跋峰巒而頻問聆石泉
三折而東之諒前途伊邇可勇進雲相隨乎其若無心
鳥相依乎其若不倦感農夫之刈麥嬉引鉏而弄孫奚

真朴之難復可於此而尚論既乃度漱石之新梁觀華
扁之大書欽皇明之賁飾匪淳熙之舊模聖像儼乎可
畏規言炳乎足誦曰既及乎其門敢不繩夫步趨嗟孔
道之再興惟太極之一圖爰定性於伊洛亦訂頑於橫
渠視主靜與慎動尚窺壁而循除闡千古之幽秘圖與
易而契符謂朱夫子之渾然猶樂大成之槩集迹窮理
於庶物真乾健而巽入顧俾小子之務茲懼夫勉行之
不給矧危微之墜緒烏記誦之能緝天既設夫我中聖

又示之時習胡甘白首之紛如須圖大者之先立庶據
依之有地斯御射之可執矢自今而惕勵力恒千於人
十亂曰八音宮縣夏玉璆兮聲出林木難為樛兮千載
一時白鹿遊兮其峙為山水為其流兮悠悠未艾我能
無憂兮日月逝矣亦敏求兮

白鹿洞賦

次晦
翁韻

明唐龍

白鹿山水名天下紫陽讀書在其疆上闡道學之統下
開人心之良發軔於匡廬之麓引派于彭蠡之塘曾莫

窺其涯涘實仰止乎高岡爰先祠於一拜閱山徑之就
荒耽泉石之真趣擷宇宙之竒芳天既開夫茲洞人又
聚於是庠要當從而嚮往奚可歎夫望洋進二三子於
其前轉五百年之洪運指大道以入門防旁蹊之易混
蓋闢正學之榛蕪匪直幽人之肥遯木石鹿豕與遊芻
蕘途人是問考正統之相傳繇前修而直進心皇皇乎
而有求神疊疊乎若忘倦誰道晦菴之神不在茲我將
見之羹牆而揖孫溯洙泗之淵源問夫子之至論太極

既生乎兩儀意象至發於圖書宇宙吾道之橐籥民物
四體之形模曰既入乎其室將舍是而焉詎明性天於
動靜著實地之步趨載觀義皇之心學盡在河洛之一
圖屹人心之山岳決滄海之溝渠闡明誠之戶牖別義
利之庭除彼濂溪之正脈實異代而同符方關洛緒論
之紛紜微夫子之大成莫集扶孔孟於侏離正蘇楊於
出入功有過於退之日惟恐其不給嗟小子之昏愚奚
正宗之能緝慕太史之山川竊有志於時習顧與我之

非凡將勉焉以自立率吾性之鳶魚庶先鞭之可執蹇
遺躅於靜修亦何辭於掇拾亂曰高山流水鳴吾璆兮
蒼松翠竹惟木樛兮吾道白鹿誰與遊兮千載紫陽屹
中流兮道之云遠我能無憂兮武夷雲谷從茲求兮

御定歷代賦彙卷十八

御定歷代賦彙卷十九

地理

石鐘山賦

有序

明何喬新

彭蠡之口有石鐘山焉蘇文忠公辨之詳矣士大夫喜
幽尋而樂勝選者莫不遊焉景泰六年春三月余與今
夏官郎中王君尚忠俱以進士奉使江南尚忠家湖口
邀余艤舟絕壁之下以訪其所以謂石鐘者水石相激

響若洪鐘始信昔賢之言不誣也因為賦之後十有二年尚忠出示舊橐俾重書之因歎余學之不進而悼勝遊之難再也乃刪其辭以歸之云

乙亥之歲暮春之夕余與王子汎舟澄湖艤於絕壁援危藤登懸崖以訪昔賢之遺迹於時天和氣清江空月明魚龍咸伏波濤不驚縱余日以遐覽舒懷古之幽情但見怪石嵯峨嶮嶮礧礧崢嶸奇形異狀不可殫名或如鳳如螭欲蟠欲飛或如鬼如獸將行將驟巖峩瀟瀟對

拂藍撲黛穴罅呀咥欲雲歛雷異哉石乎蓋造物者之
所胚胎也俄而微雲生於廬阜長風來乎太空驅濤擁
瀨吼鯨躍龍爰有洪聲發於水中殷殷喤喤如遊舜庭
而聽鏞鐘之撞鏗鏗鈞鈞如入周廟而聞無射之聲填
兮若雷颯兮若雨又如卻至使楚而金奏作於下余乃
恍然而驚悄然而思問王子曰此何聲耶豈靈鼉奮首
而三山頽耶抑海若驚起而號風雷耶無乃共工氏觸
不周而天柱折耶胡爲乎有是聲也王子笑曰子不知

耶是所謂石鐘者也昔者酈元言之而不詳李勃訪之而失實東坡居士汎舟江上以求之而後衆論定於一也余曰石之爲物塊乎其形未與水遇不聞其鳴水之爲物湛乎其清未與石鬪若嘗有聲彼函胡清越窾坎鏗鞳之音果出於水耶亦出於石耶王子曰不然夫水之性動石之性靜動靜相摩厥聲以應水之質柔石之質剛柔剛相盪厥聲以彰是非水之聲也亦非石之聲也水石相搏而聲出焉此石鐘之所以名也夫峭壁巖

巖鐘之銑角也懸蘿裊裊鐘之旋蟲也丹崖翠壑鐘之
莫筮也驚濤駭浪鐘之撞杵也是鐘也蓋天地爲爐萬
物爲銅陰陽爲炭造化爲工齊侯不得銘其績而鳧氏
無所與其功也嗟夫洪水橫流巨浸稽天象罔出而侮
人螭蜃過而垂涎民其魚矣尚何鐘之聽焉今吾與子
脫介鱗而弁冠去沮洳而宮室汎蘭舟以遨遊聽水樂
以自適揆厥所元伊誰之力耶於是相與徜徉眺望咨
嗟感激已而雲消風止浪平響息水天相映瑩然澄碧

返而登舟呼酒相酢乃鼓柁而歌曰駕吾舟兮汎長江
馮夷起舞兮酌我以羽觴侑以嘉樂兮鼓鐘嗶嗶慨念
上古時濁流湯湯孰致平成兮孰理懷襄願銘此鐘兮
紀神功千秋萬歲兮永不忘

石鐘山賦

有序

明丘濬

石鐘山在湖口縣東坡居士遊山記千古無改評矣曩
余嘗遊其地誦其辭而又竊有所見焉夏官郎中王君
尚忠縣人也近出示其圖求賦盱江何秋官廷秀既爲

君賦之矣大率本坡意而廣之意盡而語工余無容其
喙乃即所見爲後石鐘山賦云

巍乎高哉茲山之天造地設也扼彭蠡之口拉岷江之
脇鼓天聲而震動橫地軸以鎮壓豈非東南之巨障湖
江之奇絕處乎爾其氣勢巖從岡巒嶮嶭行駸駸之幾
里崇崛疊之萬疊危臨深而欲墮直倚空而如截下瞰
馮夷之府上峙瞿曇之宮洞空明兮穴竅蕭蒼翠兮杉
松余嘗艤舟其下履險陟崇爰窮幽而探微盡詭狀兮

奇蹤望天塹之渺茫極嶽祠之穹窿適晴空之過雨晃
晨曦之昭融雲澄澄其歸岫波沄沄其成漉萬籟聞息
一碧連空於斯之時但見石之爲石千態萬狀怪外而
空中而竟莫得聞噌吰之無射窾坎鏗鞳之歌鐘也余
乃悠然以思悚然以興揆厥山之所元兮始於酈註之
解桑經繼以少室山人之博兮終以東坡老仙之精曰
古人之名山兮多惟其形夫何獨茲一拳兮乃不以形
而以聲矧石之在水兮不能自鳴必風濤之搏激兮然

後滂濞而訇砰風或有時而息波亦有時而平名山者
顧舍其天然常有之巍巍而下取夫適然作輟之硜硜
吾恐君子之正物名以明民不如是之浮緩不情也於
是呼兒挹酒注之巨觥釀江流酹巨靈起而問諸以訂
茲山之所以名

大孤山賦

有序

唐李德裕

余剖符淮甸道出蠡澤屬江天清霽千里無波點大孤
於中流昇旭景於匡阜不因佐官豈遂斯遊謝康樂尤

好山水嘗居此地竟闕詞賦其故何哉彼孤嶼亂流非可儔匹因爲小賦以寄友朋

川瀆熾道人心所惡必有穹石禦其橫鶩勢莫狀於澹瀨氣莫雄於砥柱惟大孤之角立掩二山而傑豎高標九派之衝以捍百川之注耽若虎視虺如龍據靡搖巨浪神明之所扶不倚羣山上元之所固彼邈迤而何多信疑然而有數念前世之獨立知君子之難遇如介石者袁揚制橫流者李杜觀其側秀靈草旁挺奇樹寧憂

梓匠之斤豈有樵人之路想江妃之乍遊疑水仙之所
駐嗟瀛洲與方丈蓋髣髴如煙霧據神鼇而翫璇逐風
濤而沿沂未若根連坤軸終古而長存跡寄夜川負之
而不去雖愚叟之復生焉能移其咫尺

麻姑山賦

宋李觀

巍乎高哉茲山之爲異也吾不知夫幾百千里之廣但
見土老而石頑頂天以直上驗地勢之所極固亦東南
之藩障者乎路蹊蟠鬱前後相失岡巒萃律左右馳突

鳴泉百雷躍下雲窟喬杉萬矛舞破煙骨靈竒恍忽變
見出沒匱耳目之觀聽曾不究夫萬一其間則有名天
之洞禮神之堂高臺層瑤吸日月之光繚垣築粉孕芝
蘭之香偏門曲廊入迷其方斜軒亂窗或明而涼况乎
御龍膏之酒倚雲和之瑟一飲一石一醉千日安知億
萬人塵衣飛蚤蝨其或黯然而霧飄然而雨跬步之內
則朦無所覩夜長漫漫山空月寒鶴羣戲風舞羽珊珊
老猿抱子吟聲欲乾怪物參差松柯水滸或步或馳或

嘯而悲仙乎鬼乎千態萬狀而使人心疑別有澗石之
迤邐園潭之無底是曰蛟龍之所止嬾而爲旱怒而爲
水嗟我力耕之民輟衣食之資而爲禱祠之費巖岫冥
冥古無人行百獸飢死虎狼夜鳴是何假上真之名而
神姦之所憑也悲夫以地之奇以物之靈而逋客之經
營全形養氣采朮茹菁未嘗有茄簫之聲鸞鳳之迎謝
人品而凌太清者徒見山寒兮青青水秋兮泠泠雲路
咫尺而不能以升豈非仙可得而不可求道可悟而不

可學彼其叛稼穡之功遣室家之樂越天常而慕冥漠
宜乎白首於丹竈之下幽死而無所託也

麻姑山賦

有序

明曾應祥

是歲玄默攝提格終病之月望後三日曠叟與客畢事
於郡城返舟南十里抵從姑山下西望麻姑客喟然謂
曰麻姑山勝槩僕未能一至吾叟盍相與舍舟遵陸一
登覽焉時值廣漠風恬舟師弗之許不果行客乃怏怏
余謂客曰余曩與容齋湯子遠市劉子蓋嘗遊矣山之

佳致粗記一二試爲子略陳之賦曰

繫麻姑之爲山兮鎮南服之要衝壯盱郡之形勝兮俯
江漢之朝宗借層巒之崑崙兮盼疊障之穹窿勢岌業
而若馳兮羌偃蹇而橫空途有險易丘別卑崇石顏頤
而將駸土花老而欲封煙骨轆轤雲根蔥蘢古藤疑鳥
雀怪木走蛇龍陰陽迭其代序烏兔環以西東風飄蕭
兮斷續霧滂瀟兮溟濛嵌厓半墮絕壑猶淥領地靈之
歛翕削天巧之崆峒倒飛瀑之千尺灑流沫於長洪擬

白虹素練之縈帶方百雷萬古之春容上而軍山恣其
老嬾下而女冠遜其纖穠掩四顧其蟠蟠屹數仞之顛
顯宜其從姑爲之近侍葛仙之所依從爾乃旁觀列岫
則有鳳岡獅石駝嶺龜峰赤面玳瑁華表芙蓉雖名稱
之匪一亦培塿之難同此則山之大觀也若夫凌華確
陟嶺屹跂霧閣叩雲關行行且止是曰半山從者脅息
徙倚盤桓迴梯斗絕疊磴星聯枕流淨漱垂玉遙連齊
雲直上仰高孤騫其亭斯翼其扁斯懸語長生則有萬

壽之宮事幽隱則有桃花之源禱甘澍則有金龍之潭
醞嘉釀則有神功之泉七星列杉獨松開軒丹砂擲米
碧池化蓮訪詩僧之高墓參仙著於碁盤望三清於廣
漠揖五老於岑巔信乎匱耳目之所聞見曾不究其萬
一者焉峰回徑轉路乃平平即蔡經之故宅建仙都之
瑤壇道書所謂三十六洞之一榜爲丹霞小有之天是
爲會王方平之地金杯玉琖擘麟脯而侑瓊筵余想夫
吐芳辭兮襲人講仙術兮玄玄閱世歲兮不知其幾變

唯海水兮三見爲桑田偉清談之近道曾不樂此狡獪
之言見顏魯公之碑記忠肝義膽照耀石鐫鐵畫銀鈎
歷唐代而爭妍李說書之有賦風情逸興亦抑異端嫉
虛破幻乃一洗於神仙是皆名邦之所獨擅中古之所
流傳即更僕而未盡豈傾蓋之能宣請憑再訂尚俟博
觀或庶幾其周旋客曰以子之言今亦詳瞻然提之於
耳孰若紀之於編於是命毛穎拉陳玄會陶泓滌雲箋
叙茲山之佳麗紀登臨之勝迹聊風雩以詠歸睨層雲

之遠碧

龍虎山賦

元闕名

隱者無名考史稽經間日有客來於上清陳述師道其
口不停余耳由傾賦爲衆聽漢有異人長髯碧睛噓爲
雲興怒爲霆驚石竇一室松門兩扇棄分茅之敝屣構
至道之玄精爰考厥裔實爲子房之曾者乎始蜀爲郡
山幽谷冥大厲被髮而橫掠怪石馮物而起聲魑鬼獨
足豐狐干形蛟涎旅麀虎喙人腥凡川陸之交會皆魑

魁之深憑阻國命而暴物亘千里而靡寧時惟異人惻
然太息功成九轉身騰兩翼戒山川之攸司訊鬼神之神
秘迹得請於帝百靈受職岳祗峩峩而順令瀆鬼濛鴻
而共役春孟夕望月高露寒俄慶雲之屬地覩玄元之
降山金聲天譯玉色仙鬢宣言秘奧弭節盤桓但見夫
印解肘後之囊劍離佩旁之玦龜紋龍鱗科篆鸞血影
連天章光奪素月命為九天之師班右羣仙之列咨授
既已清蹕遙舉總幽冥而付察羣高卑而來賀則有天

孫薦筐天瓢注竿芳以挑實甘以龍鮓雲韶鏘鏘煙軒
雅雅徐有九潦丈人揖青城山人而言曰蜀處西陲彈
丸一隅異人所都人鬼晏如江東之地妖祀淫巫高明
瞰室負塗載車余職舟航願師往厭遂令馮夷除道海
若治檝回首岷峨轉盼巫峽呼洞庭之君主訊鬼谷之
常游逆彭蠡之導源見靈山之遐陬壤接楚越宿連斗
牛紫氣薰天神光塞丘師乃縮地策杖絕江舍舟盥碣
石之瀨尾登琵琶之嶺頭始卜水西俄遷北麓爰有赤

龍透迤黑虎攸伏飛鳥銜火以燎焚靈蛇吐泉而溜掬
雷鞭當塗之石般獻無枝之木築址建室鑿山堙谷此
龍虎之宮所以爲東南之美觀也其山則高藏雲根遠
鎖煙骨陰陽轆轤日月出沒積藍乍乾蘊紫俄勃東隱
鴻儒南育蜃窟玄猿夜啼雪鹿晝突彼匡廬羞其老醜
懷玉遜其紆鬱也其江則清源發閩寒瀑匯津蟻航亘
日漁艇嘯雲懸崖仙棲百器具陳倉廩甕盎機杆車輪
撤故營新林落溪澹彼三神宥而難覓武陵寓而非真

也若夫宮室之制廣乎袤乎吾不得而方也觀其架楹
之梁燧虹之長列綺之牕排煙之蒼禮神之堂金碧煒
煌習仙之方佩服琳琅蒲牢萬石栴柏千章方爽塏而
邃密忽幽眇而張皇白晝變晦朱蒸疏涼鋪以冲虛之
席爇以明德之香中有却粒老叟身輕欲翔竊桃嬰兒
臉明且光趨如鸞躔立如鴈行醉或干日奕或三霜句
有聯鼎術有玄漿木華春暉月冷秋寂意行紺溪興在
瑤壁提攜瘦藤撫弄孤笛坐松根而若遺舍石瀨而猶

憶煙霞默契乎心期風霜不欺乎鬢黑固不知舜蹠之
爲是非晉秦之爲今昔也正七十月望以典崇而靈風
動徼福雲從裏糧雜於殊域列貨侈乎鮫宮設水火洗
滌而鍛鍊俾幽明昏塞而開通則有黃冠致辭鞠躬迎
當代之師伏章於玄壇之上若曰入地升天形留神往
我披鴻濛我經莽蒼昏昏乎入太清之廷得旨於司人
之長玉漏戒曉瑤甌夢回萬人竦命帝曰俞哉雪霜雨
風適其候札瘥天昏泯其災人歸錄昇海曲巖隈若乃

飛昇尸解之說莫明邃古之初仙或有種道或有家既捐爾有形之累何規乎卜年之遐留侯傳再而嗣泯彼蒼繼絕而胄華汎靈株於秋潦竊機石於銀河亦稱師之鼻祖會義譜於仙都逮茲四九之適際煥乎令聞之孔嘉且夫懷章而私居者古稱近屬之國不名而猶拜者漢昉元功之何今也長揖而絕百僚之禮錫命而闡虛無之科提吏部之選筆倣祠部之絲花於是瓜分道路之職輻輳東南之車執贄駟首獻方克閭列荆山之

羣玉陳滄海之囊珠抵掌扼腕者御空而憑虛攀鱗附翼者拖紫而紆朱寵聯乎蘭樹爵及乎葭莩酣龍膏於甲第飫麟脯於珍厨清歌曼舞長袖輕裾孟嘗春申交遊視之而寥落平原金谷卉木對之而蕭疎殞未蹄於站路奔黔首於泥沙論功過之威福執陰陽之慘舒示無形之鈇鉞懷不怒之泉阿方古諸侯而莫比顧今四海而何加此其爲道德之富所以熏灼宇宙冠絕往昔者亦奚修而致此也邪嗚呼噫嘻世有隆替道存依違

和光爲是執一爲非權輿乎劉蜀烜赫乎宋徽繇歷既
久風流山暉神怪不測善幻出奇孰得而周知惟聞日
新符篆之函卷風送鬼物之驅馳寰區稽首而無間愚
俗聽命而奚疑復有赤壁孤鶴遼東令威託行蹤其遼
絕詭形體其支離或嗜酒而嗜詩或談軒而談義茫茫
少據浩浩靡歸卽所謂神仙乎而雖然方飲方食且裳
且衣亦必有不可見者深居海角而天涯嗚呼噫嘻非
山川之奇寵靈之施何能盛大而如斯

峴山漢水二賦賜襄王

明英宗

方城之陽漢水之旁有峴山兮屹立亘數里兮蒼蒼其
嵯峨巖嶮雖不足壓乎天下而規模形勝實有以冠乎
湖襄余有感於是矣方其洪水滔天四海茫然所以奠
之者古神禹也及其戎夷亂華赤子龍蛇所以定之者
余祖宗也今其被冕而裳垂旒而王國於茲山之陽者
余叔父也微神禹奠於前兮夫孰能成此疆宇也微祖
宗定於後兮余叔父又安得王於斯土也享其樂者思

以保其樂食其功者思以報其功大哉神禹皇皇祖宗
奠茲峴山德懋功崇惟厥德之不棄乃無忝於所封庶
同休兮媲美與茲山兮無窮

右峴山賦

吁嗟漢江實南國之紀也非彼有德曷能王於斯土也
作邦作對是宜在我叔父也何以見其然也維彼漢水
有安其流維余叔父其心休休維彼漢水百折朝宗維
余叔父其心與同維彼漢水其大有容維余叔父湖海

溶溶維彼漢水奠此南邦維余叔父休有烈光大哉漢
水賢哉叔父萬壽兮無期永奠安兮斯所

右漢水賦

玄嶽太和山賦

有序

明 王世貞

太和山者蓋中州之脊而上帝之靈腑也其始不甚顯
一曰武當山又曰參上山又曰仙室山晉咸和中歷陽
謝允棄羅令遁茲山遂名之曰謝羅山見酈氏水經注
及荊州圖副記蓋是時絕頂峻不治不得上諸所棲息

者山之趾以故靡甲稱云至宋而謂玄武神實主之後
又避其諱改玄武曰真武而宮室繇創矣元始加帝號
至我太宗文皇帝尊之曰太嶽世宗朝復尊之曰玄嶽
而五嶽左次矣歲旃蒙之大淵獻春三月吳人王世貞
填綏之間一登謁焉感其峰嶺宮闕之盛與其事而爲
之賦

昔在帝太始氏製陰陽剖澄凝掌別五嶽以授七十二
聖昉岱首而亘金天焜煌黼黻以躋九命乃眷西顧有

亭亭類博山者出焉下盤際而逾運廣銳直割乎齡界
之闕塘屹橫揭燾界嶠豁其西北引庸岷絡終華而首
飲乎中原爲嶽若八九者吞焉帥其支峰以媚帝閭恫
帝之不察敢以測霄之圭與亥步其四藩不然請外托
而季從乎崑崙惟帝曰噉夫契有因而顯有辰時不取
遽主必擇真是故天水氏之奄宅也爲寓公宮若亡若
存以竢玄冥之時巡胡祠殫林諱其金人水德用彰瑤
宇岨嶙我文皇篤志鴻緒回面內蹂獨奮神武亦駕天

授况靈威之輻輳被髮立而三光部揭燕彈之百一俄
宇割其十九嗟九靈之革變黯二儀其霧濛聆火鈴之
豁落駭烏旂之黻黻吐元緒與率然亦糾紛其來從既
闡教於神道竭疑功乎惟重苟神貺之昭答何痾乎民
力之侈用於是太史覘土奉常告時五鳩鳩民將作庀
材左駙馬而右中涓六傳騷以趙催襄鄧宛洛之民蹄
擊轂履楚訾蠡午以逆上隴木駢闐而順來于于禺禺
千唱萬隨陸歎激湍冬謹驟雷乃使倭輸窮巧獲蕃既

力分模紫宮取則宸極又似踔翼乎九閣歷清微而叩
大赤命甯陬而佐之俾象鏘鏘之積石恍若入於函谷
歷落兮離宮之四百淨樂依稀乎東朝玉虛髣髴乎未
央紫霄桀騫乎甘泉南巖差池乎阿房五龍窈窕乎馭
娑迎恩雖蘇乎鼓簧觀則復真胚始仁威懾降元和遷
校之府龍泉烝鍊之場莫不堞嶺隍壑冠峰帶岡分背
寒暑別成陰陽潺湲負澀網縕象郎裏鬱律而徑庭表
巖嶮以直當彩栴杈以戢善文椀鞞鞞而縱橫晨星

熒煌乎壁鏡雌蜺夭矯乎茄梁乃復發重艷氏之所藏
使和氏選而攻之瑕璣枝斯无瓊玕琪像帝之真理別
鬢廩璠璿瓊瑤堅瑪堆珉琢爲宸座躡跂蚪螭乃藉淠
鄧付區嵇和合鉞釵鼓媾鑪椎細則禹鼎之類膺鉅則
秦廷之欺偲鋸牙鑿齒燕頤鬣翼之類足方良手虻魁
睨蜂眸而欲搏夸血吻以將噬感豐融之肝蠻意炭嫠
而求退葯房寥窈竊權榻膚綴鶴蓋替麗鸞吹流利餒鬯
餘之泔澹眠歸雲之黠霽此其陶然樂而跳塵世者也

夷峩方軌馳道如砥總柏周絡金椎隱趾繇蠻格磔媚
不絕耳歲恣峭蒨當眸而弟泮乎其殊可喜也紛彼靈
簾前奏鈞天忽絕忽續從颺曼延乍顯乍習與雲流連
霓亅虹存眇若騰騫快然精氣溢而欲企也俄而恍兮
使我恫兮躡崩施穿奔中下增峻峭窞而嚙趾兮上标
髻嵒靡而盪胃俯窅窅其徑庭兮仰又棧斲而不可窮
前呼要眇幾若絲兮應礮袂而類處窺輕陰釀而裾涅
兮蒼翠撲而睫覩忽徑絕於阨堵兮使人魂恣而精降

顧砥衡截屹嶷疇援足不謀目糸息股弁五步一止左
檐呈胼天門杳靄若啓尺綫破靉隸穿軋芴兆底設設
爭先跋躉魚貫蹠殿猱牽掬搥岨臂隴肝胡膽越魁
瑕二董之俊錯以敦讎駘跂爰有姬姜貴秘陽蔡姝絕
螭蟻此豸要紹媿屢綦履不任芬澤微發莫不羽鬣犀
紕露紉練恰澀喜殿屎盤跚勃宰擘銀鐺以稍振叩陰
牡而嗚咽哀囂徹空宛潮音之迤邐悲涕懸河儼秋霖
之汨活銅蚪左啓羊角瞥至拔圻坤兩喻欲與二游蓋

飄飄其纖翮幾欲擲乎荒之裔黃冠所廬可以假憩層樓帖石周閣無地挈莖葩雜捷獵鱗次密戢兮寒房之聚蜂獺掾兮春潮之歸螭神搖搖而時斲心栗栗其如鬻於是黜聰明顛精深薈沐滌躬清齋盟心窮太和之睽眾遂底乎天柱之岑覩重巒之宛曲與綺寮之麗淫列將吏之蘭綺若酥瓚之崇森悉都官之赤仄塗以褻蹄之上金芒穎注射睛不停眴赫烜灼燥煌熒燿炫芬塏蓬勃忽似處乎空濛潤衣裾而不敝哀音厲至幾若

闕乎邯鄲卷屋瓦其如霰度羣喧之屏寂兮始騁望以
逍遙竊欣夫塵世之判閱兮察天人之所交玉女醫嘘
而一槩兮電碣磕橫亘乎巖腰霆霓驚乎百里兮雙禮
珠微揆乎銀璫夜澄澄其湛露兮泠然若初滴於絳杓
白榆睚眦於楹表兮幾欲奮翻而求巢雙丸搏娛於蚤
晚兮屏翳卑處而不得繞儼帝聰之呼吸兮杳旭卉其
莫昭於是俯踞三垂流覽大荒寄寓一瞬投心渺茫或
翔陽弄晴激濫沖融煜乎若五金之在鎔喬雲呈姿異

態同輝皚乎若瑤臺之刊夷白不封尖峭碧摩天晃乎
若叢鏃之辭弦晦明參差旁午紛拏沓乎若銀海之蕩
層波時隱時現襄江一線或滅或浮夢澤一杯遠則仙
掌巨靈之顛負峨眉五丁之斤鑿丈人偃蹇乎青城華
存尚羊乎衡嶽太室少室之歲襄中條終南之岵崑陰
脈潛通外勢包絡雖未甘乎臣僕感時趨之曦燭通則
香鑪凝靄玉燭華峙九卿棘列三公槐植七星斗蠹五
老掌篋中笏上朝玉筍排次淋瀝雙筆飛翰疊字紫蓋

飄颺看稜鎖翠天馬翼翮而騰上靈後鬋鬣而斜睨蓮
不大小以掩帶陽鶴鳴和而鼓翅春淡冶其微莞夏沈
穠其幾醉秋淨皎其初沐冬慘淡其若睡雖摧蓑兮麗
億靡不環拱極而思媚獨房陵之一邑乃嶽刺崆峒乎
境外鴻娘爨之獨逮托平巘其小息聊賈壯以夏勝信
足境之幕廡俯鉅壑乎萬尋白日簪而蒸雲圍苟獬豸
其稍邇蹀躞盤余焉恤阮薛豈第整學劣崩醜若鳥矚
雄若贗摩似乍伏而俄奮挺牙距而虜擊復有千章叢

挺黝霍阜壠萬古不死輪困擁腫其為蘋末之所鼓卉
歛劉莅蝄竝洶湧根繫則而弗奠類蛇蚶之鱗起即且
監腦而蠕動僚兮慄悚兮恐慄乎其惕而左顧余踵也
爾其清泚徐傾蕭瑟泓渟遘暝不涓觸石自聲淙淙汨
汨縱縱錚錚乍徵而商絲肉雖鳴芙蓉倒插散鬢微升
神瀆湧璣金沙流螢枕聽酌敵九咽為澄其澗則青羊
玉局僂龜玄鎮梅溪勝越桃源比晉靡不插壁留霞飛
梁吐蜃其橋則仙源仙都遇真會真天矯梯雲遙喬天

津靡不長虹飲渚圓月麗旻磐陀之石橘叟所奕削脯
角飛盤擎現跡瓊臺迴顧帝所授冊封泥散紫餘檢成
璧宛委探書浮提副墨玉蹠金題雲符秘策太一天乙
日沼月澤燭龍布涎神漢流液丹砂九轉白茅三脊璘
彬雲母以資服食木則杉檜樅栝松梓椶柏槲楸杪槁
檨檟楨檍交讓呈蔭靈壽支策梢無礙漢根不避石恣
傲四候罨閱千昔結為碩果鮮殷酷澁襄橙鄧橘張梨
房李含桃女唇火棗仙餌飮座襲目咀瀋溢齒根梅標

瑞而蜚舌石蜜借以爲醴冰芽之薈產自騫林顧渚慙
芬鳩阮遜甘蟬翼霏塢雀舌沸鶯篠蕩愛對編町繡丘
霏霖初滋潛萌未茁穀玉含腴衣以金苞濯江漢暴秋
陽撼紫泥藉朱筐八足騰傳披星犯霜九重涓期以奏
新六宮舌羨而不敢嘗乃有庶纖土德所滋千年之艾
松齡十之荃蒟蒿茵菩懷菴施暎愛苾芾入鼻熏禱天
葵秋發映山春滋百里障錦又若紫純一醉枕藉若馮
夷施忽有哇妖因風徐來睨眈和囉含糊啾啾嚶嚶闌

關燒燒靡靡覩黃口之蟻螿疑天樂而復非意調昶而
甫紆喟駛景之難隸覲扶羸之妙藥指長鏡而思采亦
何勞訪乎宜州茲實仙都之陸海固炎帝之所瓠嘗而
隸首之所不盡解者也不覩夫萋繞勝烏白鮮紫扶甘
根叩鉅茵陳此胡南星水玉符離利如香附扁畜重樓
蔡蘆益母鈺生防己夜呼葶寧天麻蒼鬱地榆皆能撐
距二豎擗殪羣魃百勞賴其德圍五官之所儲胥未若
三暴之鍊雞格九節之辨菖陽紫莖之貴牛膝玄參之

宇鹿腸枸杞夸仙人之杖麥門表禹餘之糧豺漆供而
濕消玉延餐以生肪淫羊之藿靈脾別呼交藤布根何
首不烏此皆皇仁所寄祇不愛輸澤瘁實空動與益俱
肉翻頃以鷓鴣朱顏藹其藟俞忽翛然而穢世撫萬期
之須臾遂誦茂陵之言曰唉得從安期生游轡萬乘若
敬屣何況妻子哉乃集三管之所述相與考諸真之由
起或誦周季二尹軌喜是爲鼎鼎厥號文始或吟兩生
明長禪美受度勃遂厥有棲趾夫文始青牛挽函谷太

上玉局顯魚鳧馬明吸羽騰華陰陰長蛻骨遺丰都第
彼顯則此隱豈後核而昔誣意者之生遺帽仲微曳裾
辭令道通納節易夫田寒暑其一蓑房旦夕而長鬢庶
幾其猶可指踪歟粵玄玄之黠秘實上真之蠶良功留
跡隱用彰體藏暫閃屍而可即忽希夷其難方俶使夫
人主常伯若虞初之卜吏駢馳衣黃者二十餘霜卒莫
得其要領徒文繡乎土木而宮室乎陵岡於戲皇哉明
哉明哉皇哉亂曰因天成人合乃神兮虛有實無衆則

愚兮靈寵光豔趣則驗兮岑牢往祀嚇來世兮當心者
真豈必書兮彼美泱泱永無鳩兮

九疑山賦

□ 黃表卿

天下一景湖南九疑按諸古以為據考其圖而可知龍
駕不還萬世衣冠之在馬蹄所至十分山水之奇戴堯
天而身屬堯民履舜土而心知舜事數千年百千載之
遐蹤遺跡七十二三十六之福地洞天此則居其一也
何為渺茫彼乃疑其九焉見諸圖誌父老常言迄今以

傳巫中黔中屬乎楚之邦吳之境零陵舂陵分於秦之
後漢之前仙蹤顯天皇之始載郡名標貞觀之初年地
方千里而物外勝地天南一角而壺中有天攀斷龍髯
黃鶴莫留於仙馭空遺虎鼎白鴉猶養於玄田八井俱
涸而一井涌泉九峰齊高而三峰壓衆桂林杞林左右
森列石樓石城東西護送有朱明有華蓋而簇成萼綠
一華曰娥皇曰女英而對笑桃花一洞下臨玉瑄依稀
玉瑄之吹鸞上有簫韶彷彿簫韶之來鳳古者得道帝

之有虞浮湘江而泝瀟浦登疑嶺而望蒼梧灑西江之
淚兮斑斑之文竹千畝奏南風之琴兮戛戛之古松數
株三麓牀中丹鍊九轉萬歲山上聲齊一呼所以尚書
已有陟方之語至於史記廣爲考古之圖乾坤大而聖
境亦寬日月長而仙家不老碧虛巖前千怪萬狀紫霞
洞中十洲三島六月無夏惟木惟石四時有春非花非
草茲境爲勝異時可考經藏石室隱然六甲之護持亭
立仙梯宛若五丁之開道客難之曰舜居蒲阪本屬乎

冀之北舜卒鳴條不在乎夷之西殊不知無本不立非
文孰稽有舜江則可枕可漱有舜壇則可攀可躋月帔
兮明月上雲閣兮白雲齊九溪源下之流派萬丈天邊
之石梯鳥篆穹碑刺史元公之筆電文怪石舍人李嶠
之題余應之曰百豈無於一二十未喪其八九紫霞高
卧前後十四輩白日飛昇小大三百口不然是賦也何
爲而作焉以代門下摳衣而藉手

荆門賦

明
劉彥昂

君山秋分蒼蒼洞庭寒兮欲霜雲流碧兮潦盡木隕黃
兮菊芳白鴈銜蘆七澤凍玄猿號風三峽長客有佩明
目之琳琅翳鳳凰而翱翔纓茜飄兮絳彩月蓮吐兮雪
芒思攬轡於昭丘爰弭節於荆揚顧漢水之爲池睠方
城之爲隍據軫翼之躔次古熊繹之封疆沅沱既導朝
宗於王厥土惟泥黍稷穰穰駝馬被野牛羊彌岡纏組
燦爛金玉鏗鏘菁茅菌簠栝栝豫樟鴻鴈鳧鷖鵲鶴鴝
鶻砂丹石翠椒紅橘黃玄獐大龜赤鯉青魴羽毛翠草

物產之良實富國強兵之所利宜并吞割據之相攘也
嗟乎維昔漢綱解紐炎靈中微旄頭夜蝕天狼晝垂赤
刀鳴於武庫白魚雨於京畿士流板蕩黨議橫馳姦臣
竊命太阿倒持曹瞞挾翠華以遷許董卓積黃金而築
鄒六鼂揚塵於紫泐九龍失水於瑤池志士懷攬轡澄
清之嘒勤王動枕戈興復之思通人俯仰於形勝未嘗
不痛恨於桓靈之陵夷也東望夏口蔚乎武昌鳩鵲之
觀抗神宮於雙闕黃鶴之樓凌雉堞於中央鸚鵡芳洲

帶草色漢陽野樹迷煙光淒其赤壁烏林浙瀝憶樓船
之如林想旌旗之蔽日殷動地之征鼙列連雲之戰格
妖氛引於宛洛殺氣纏於郡邑火星晝騰烟礮夜擊檣
連烽燧岸走沙石龍虎決於雌雄成敗等於呼吸謀興
輔王業於萬全何土崩瓦解於瞬息孫策周瑜之成美
曹操張遼之失計事竟敗於驕矜身幸免於倉卒致當
時之扼腕重來者之歎息故壘蕭條斷壕周遭江屯崩
雲湍呼怒濤揚柳嘖春於別渚蘆花慘雪於殘潮寄登

眺於草木付歌嘯於漁樵夢明月於白鶴弄春風於紫
簫往矣釀酒臨江之槩傷其橫槊賦詩之豪所謂東風
不與周郎便銅雀春深鎖二喬者乎南望則岳陽之區
雲夢之墟包羅潭沔浮太虛衡嶽嶙峋朱陵氤氳娥
皇遺廟粉鈿消香於春色蒼梧故隧深澄沉彩於秋塵
玉鸞剝於寶鑑金鴈浮於海銀長沙之津瀟湘之垠鳴
夜雨於斑竹卷西風於白蘋困遷謫之賈誼悵行吟之
靈均忠直之諫弗任泣涕之書徒陳天衢騁於駑駘草

澤閔於騏驎楚人致懷沙之悵漢文空宣室之勤所謂
可憐半夜虛前席不問蒼生問鬼神者乎西望則白帝
插漢鳥道際雲灩澦霜沸我眉黛勻龍湫虎牙尾閭吼
白鹽赤甲虞淵昏天府沃壤於以定霸而制國鑄山煮
海於以濟世而安民啓中山之帝胄倡大義而奮身結
闕張之英姿同魚水於君臣起躬耕之高卧枉三顧之
殷勤義旗渡於瀘水耕者雜於涓濱運木牛與流馬生
八陣於鼎分誓鞠躬而盡瘁痛嘔血之酸辛墮大星於


前第傷漢祚之遄逝所謂出師未捷身先死長使英雄
淚滿襟者乎北望則襄陽紫迴峴首崔嵬汝潁曼衍唐
鄧宏開沙湮檀溪之浦棘覆龍山之臺孟嘉芳躅帽落
斜陽於杞菊龐公高隱徑迷斷靄之蒿萊高陽之酒徒
零落習池之歌舞誰來更無金鞭換小妾寧復銅鞮歌
落梅紅剝鸕鷀杓翠消鸚鵡杯淚亦不能爲之隋心亦
不能爲之哀所謂晉朝羊公一片石龜龍剝落生莓苔
者乎吁噫兮風景不殊山河如昔慨戰馬之何在消風

雲於倏忽何三國之英傑逞干戈於智力措蒼生於魚
肉不能安一日於衽席爭腐鼠於飢鳶致羊藩而躋噬
徒區區於井鼃莫能混南北而爲一豈天運有常抑非
人力之所能致者乎偉哉我皇龍奔虎驟雄劍一呼囊
括八荒大明中麗日月普光四夷八蠻折津扶桑莫敢
不屈服莫敢不來降干羽舞而獻旅葵蕭韶奏而來鳳
凰制國定都分茅建邦衍金枝於玉葉頌寶牒於天潢
紀綱永世本固支強玉璽金券鸞輿煌煌昭圭璋於袞

冕畫粉藻於衣裳地控上游履盡荆襄以定社稷以開
明堂宮殿麗於九土旌節衛於五方壯軍容於萬里覲
玉帛於梯航圖書之府奎壁之章卧金甲於綠沉包虎
皮於弋囊仁以爲紀義以爲綱帶礪之盟永茂永昌小
臣獻賦祈萬歲而躋於虞唐也



御定歷代賦彙卷十九



總校官庶吉士 目張能照

校對官編修 臣馬啓泰

騰錄監生 臣張桴

騰錄監生 臣姜也魯